



如阜縣志

ル 5
3280
7



明
凡 5
號 3280
卷 7



如臯縣志卷十七

列傳二

文苑 宦績 武勳 義行 耆壽 方技
隱逸 流寓 方外

文苑

明嚴怡字士和少補諸生崛起榛莽中力振風雅好學明經術不為章句訓詁學宮故無藏書銓部陳大壯謫貳泰州來署臯篆怡諷之身為渡江購諸制書及二十一史儲焉嘉靖中以貢為校官閱二十年初訓臨胸表管幼安祠之移教景寧攝聊城令事逾年以德化民民亦從化去之日清風兩袖聊城祀之名宦最後為堂邑王教授一年乞歸怡博極羣書工詩古文辭而狷介自持意所不可者一發之於詩家無擔石之儲晏如也邑令

如臯縣志

卷十七 列傳二

七

昭和十八年
八月十八日
購本

如皋縣志 卷十七
黎堯勳以均糧奏行贈以浮田弗受令移守泰州復檄
臯以廢馬廠一區爲營居焉銓部楊武東薦入史館不
行大中丞王南岷讀其擬古秋興諸篇有異才之歎尚
使致聘亦托疾不往好獎予後進年已逾耄而禮不衰
於童穉手自營書積至萬卷子正別有傳
鞠溥字惟公以國子生丞峽江有幹吏聲三載罷歸慕嚴
士和之風性本夷曠好讀書且好客僻居城西隅有城
市山林之致年踰八十燈下猶作蠅頭細書日與馬洛
曹墳石洵冒士振輩結社尋盟風雨未嘗失期也年六
十預製棺壙作遺命人稱其曠達云

吳國禮字齊寰中萬歷壬子經魁爲文獨闢蠶叢而浩氣

游行自得於筆墨蹊徑之外雖殘篇斷簡學士爭相秘
惜至今言制義者咸稱道吳孝廉不置屢上春官不第
遂絕意進取高隱車馬湖一邱一壑吟風弄月問字者
屢滿戶外至其議塞牙橋捐貲賑饑文章中固自有經
濟也妻鄧氏守節五十年教子道一道中皆爲諸生
李猶龍字元德號海嶽幼穎異弱冠登賢書連上春官不
第或勸之入選不應歸構層樓十數楹所積書盡貯其
中又嗜古今名人墨蹟疊案盈床猶龍坐臥其間晨夕
披閱蓋樂在此矣晚年復喜內景金碧諸書年七十餘
卒

劉昌運字明卿三歲而孤依兄嫂十五入黌序旋食餼其

如皋縣志 卷一
兄溺水死昌運撫兩姪如已子嫂氏欲析箸乃盡以腴
產予兩姪而自取其瘠者曰姪孤幼不能自謀余有研
田可畊也科試學額臯舊止十九名昌運率諸生力請
於縣尹李衷純後增至二十五人學口以盛膺歲薦司
訓宛陵未幾歸著有四書旨要詩經微言讀史畧若干
卷子愈炤愈熾

曹相字國卿性樸而方嗜學不倦齋前杏一株花落滿階
除相猶未之知也嚴士和嘗夜飲還籠燭忽滅時漏下
二鼓矣從者無從得火士和曰此近曹先生讀書廬必
未寢叩門一燈果熒熒也嘉靖間以貢爲遂昌丞衙舍
讀書如故亡何棄官歸老猶手不釋卷卽夏夜必正衣

冠與簡編相對居閨闈不妄言笑

朱裝字汝乘萬歷初以歲薦爲金華訓導不三載乞歸與
嚴士和輩結社論詩嘗從湛文簡鄒文莊二公游而友
林東城王龍谿兩先生時以理學相資益生平伉直不
阿橫經授徒多所造就有成進士去者邑令童蒙吉聘
修縣志有江臯摘稿先儒要語藏於家

張榜字子登八里莊人少孤貧力學窮經授徒著錄師模
一時庠序士夫半出其門萬歷初選授司訓爲諸生祭
酒晚節湛思研精學有悟入間取先儒語錄參之超然
自會宗旨尤不滿餘姚良知之說著四書解五經解論
神論性論心諸說多前人所未發者時已得元晏疾用

如皋縣志 卷一
左手書惜散佚不甚傳

叢佳字彥夫嘉靖中以貢任淳安教諭年三十丰儀秀整才思冲融望之若神仙始學爲詩吟詠朝夕不輟語出綽有佳致聞者稱之嚴州載名宦志後終咸寧教諭弟傳字道夫過目成誦有文譽

張邦翰字君翼九歲見籬下落英有金錢滿地無人掃畱買淵明醉後詩之句時稱夙慧旣廩學宮未幾而天人尤惜之

冒愈昌字伯磨爲博士弟子員負盛名豪邁忼直忌其才者陰中之遂浪遊吳越間詩賦古文辭擊鉢立就每尚論經史品題古人霏霏不絕所至士大夫如邢子愿屠

緯真輩爭相倒屣時弁園荷花盛開厲延四方賓客卽席限韻愈昌後至揮毫濡墨不竟日得詩百首敏且工諸詩人莫不歛容避席由此詩名大著所刻金陵集綠蕉館小刻有二十餘種行世

余充美字實甫好學君子也父志學教子最嚴每夜篝燈課讀命同次子大美幼子啟美共一室非漏下三鼓不許就寢充美守庭訓尤謹故多讀書構樓數間藏書數萬卷皆手加丹鉛尤好墨刻千里外者必求得之始快於古今成敗是非確有獨見雖博而不自逞其鋒人有以僻事質者能娓娓言之使之豁然而退西峯曹學佺敘其詩曰抑才以澤理束意以遵度信然慕太學爲人

材淵藪稟餼廩入辟雍騰聲蜚實惜早卒所著莊子評
論文訣筆譚俱燬於兵

黃應徵字君求年十七遊鄉校屢試鎖院皆不得志爲詩
歌古文辭斐然有致尤善真草頗得右軍大令筆法隸
篆亦能擅長且好結客四方賓至如歸雖家中落而興
致不減有自娛齋詩集行世

殷之澤字承麗少以舉子業知名海內家貧以束脩供餽
粥受業者常百餘人屢應秋闈試不售以明經終詩刻
丁確東臯詩滙中

張玉成字成倩爲諸生二十年不得志於有司有書癖時
典衣稱貸購之雖斷朝炊不問也濟寧楊公守郡延修

郡乘下贖鏤刻所著七言律準總得四十七卷自敘曰
樂有準六十律之節以達詩有準五十六言之法以昭
度有準萬器之情以得善乎淮南子言準之爲度也平
而不險均而不阿廣大以容寬裕以和柔而不剛銳而
不挫流而不滯易而不穢發通而有紀周密而不泄準
平而不失萬物皆平得準之義可與言詩矣草創十年
所引詮釋上自六籍下及百家碑版鼎銘靡不摭摭殷
之澤常歎曰吾友成倩性夷曠訥然無所見其長及其
沉酣冊府思緯淹通雖胥臣之多聞子產之博物無以
過也中年以後貧益甚所著詩古文多散佚不存

曹銘字屏西號純孺性嗜學爲博士弟子員苦志下帷研

精制義小試輒第一棘闈十一次僅兩中副榜同邑兩魁鄉會曹鼎臣文章名世冒襄皆受業其門惜數奇未售抑鬱以沒良可悼也所著有易洞隨菴詩草子泌濂孫之標本銘所學皆得爲邑名諸生

石之冕字季孺幼穎異號神童讀書數行下九歲善屬文作書追步晉唐其詩畫尤爲絕構所圖美人甚工至性孝友有哭父泊伯兄詩若干首年二十七卒士林莫不悼惜之

國朝

許邦靖字冰壺吏部忠愍公之父敦品力學酷嗜左國不喜讀漢魏以下書作文獨闢境界不屑寄人籬下爲諸生試輒冠軍然屢試不第游學南雍受知大司成黃

汝亨嘗擊節嘆曰天下有如此才而局局轅下者耶終不遇歸而教子每漏下三鼓猶篝燈論文娓娓不倦忠愍之青雲直上良有以也其在銓司時家書數至惟以忠孝相勉無一語及他事忠愍果以甲申殉難亦可謂是父是子矣年屆八旬閉門謝客猶手不釋卷縣尹陳秉彝特請褒卹邦靖白髮皤然扶杖攜孫深幸其子爲忠臣猶及見

恩命之有加也誥封大中大夫年九十卒

冒超處字處冲早年失母父貧不能延師傅超處克自奮勵苦志下帷族叔祖愈昌爲江左名士超處往就學焉今古文皆卓然成家數奇不偶年將七十始薦明經遂

如皋縣志 卷一 賦
構簡兮堂於東郊以終老云

奈庚字孟諸家貧樂道博極羣書時有書癖之目每對賓客議論風生驚四座中年喪偶又有西河之痛俛俛出遊數年始歸再娶生三子年亦漸老矣屏跡十三里港誅茆結屋布袍草履蕭然自得所著有墨菴詩集

丁允中字詔虞家貧力學數十年歷試不售允中學愈苦子其譽進士官行人贈如其官

吳家修字仲舉讀書明道篤行力學鄉黨夙稱長者設絳帳負笈受業者甚衆家修立教最嚴風雨晦明不輟以故及門半知名士數奇不售僅以恩拔終子協姑貢士有文名

石生潤字適德生而穎異垂髫補弟子員早年食餼及膺恩選不甘以明經終益奮志下帷沈酣典籍凡儀制歷律農桑耕戰水利鹽筴馬政之書靡不窮究詩歌古文辭無不精到詩刻雜體百餘首文刻短章數十篇其洋洋灑灑千言不絕者則陸宣公奏疏三蘇策論之匹也卒年五十有二子岱巒俱庠生有聲

石璜字夏宗臯之東鄉人也天姿奇偉善騎射折節爲諸生好讀史漢八家文不屑屑爲帖括趨時好家故貧教授生徒力研田者三十年落落自如讀南華至瓠落無所容句笑曰我之謂矣因自號瓠菴爲文如風行水面惟意所欲向輒自得故識者以爲天才獨絕云五十始

爲詩亦不多作又善導引術喜讀悟真心印諸書性豪邁嗜酒讀書有得輒飲飲已復讀所著有匏菴集門下士冒嘉穗冒丹書范度劉增琮皆有聲於時

黃鐘字宏音性警敏好學讀書觀大畧不屑屑於字句垂髫時塾師爲解四子書輒謂聖賢書義當不止如是及爲文畢然高望以守溪震川諸大家爲宗坊刻帖括弗好也功力日深文章益純粹直入古人之室而終以不遇年五十有六卒著有蘧廬集若干卷卓卓可傳

吳素貴字白耳髫齡穎異童子試輒受知邑令吳宏功拔置第一卽入泮家徒壁立笈渡大江至婁東造訪張西銘先生與論文歡甚已延趙自新至臯與一時從

遊知名士鍵關中禪寺書聲常達旦由是學日進如崇正教驅妖僧著語錄諸書皆有闢世道者惜有志未伸僅食邑餼忤鬱以沒子師洛登壬子賢書師濂淑聞皆舉明經苦志食報誠非倖致也

胡邦獻字仲琛號南金弱冠補博士弟子員試輒高等爲文冲澹雅健振式浮靡順治甲午選拔入京師名公鉅卿一見皆以國士目之與同年繆歌起韓元少徐健菴齊名文出有洛陽紙貴之稱廷試考授知縣以丁艱歸里得疾不出結屋於城南藏書萬卷忘年自娛所著有絳巖居集燕遊草行世

胡邦貢字牧長少負盛名學廣而行高順治間食餼於庠

學使石仲生見之曰此江南第一人也時文風柔靡邦
貢獨宗雲間原本經籍負笈者以數百計然久躋場屋
以明經謁選司訓非其志也平生慷慨尚義族有畢氏
婦苦節而貧無與立後乃以子嗣之名之曰際可長舉
秀才有聲畢氏以安其成人大節類如此康熙初邑宰
李文秀徵修縣志與黃輔世分纂其書簡核有體要所
著蔚起堂詩文藁行於世

顧允升字吉甫幼嗜學長遊成均所與結縉紉交者皆當
時名流歸隱東園陶情詩酒以終老焉子顧渚字聖水
負笈從師爲古吳錢吉士高弟文章一準先正不落時
蹊惜屢困棘闈僅以明經選授司訓晚構確菴講舍教

授生徒一時稱盛

夏時行字寅甫邑庠生幼悲風木村居守墓於夏家岱父
嗜魚膾每時祭必薦鮮鱗一日值歲早清晨臨溪顧河
伯遇童子持竹罾置涸流取鮒倏有鯉入罾中長二尺
餘持歸祀饗鄉人稱其孝等王瑯琊焉工詩文尤善書
法鐵畫銀鈎中鋒直追顏柳真草篆隸俱精臯人珍藏
甚夥四方無不推重風規古峻奕奕乎見其字想見其
人

冒夢相字汝弼負姿穎異少補弟子員甫入泮卽失怙哀
毀骨立幾不欲生其孝友蓋天性也生平篤行力學與
許忠愍公同硯席風雨青燈共爲聞雞之舞卒以屢試

不售抑鬱而歿室李氏守節撫孤詳請旌表子起瑞列
上舍起蒙領鄉薦孫與恒與晉有聲庠序人謂讀書積
德之報不於其身必於其子若孫云

顧岱字岳宗蒲塘人也生而敏悟九歲善屬文山左王公
一見奇之嘆爲不世才號神童未幾失恃而天性純孝
事繼母無間言父萬里年踰九十溫清定省一如嬰兒
依膝下至其讀書也史漢左國諸子八家以及性理太
極諸書靡不博觀尤善爲詩古文辭弱冠食廩餼每試
必奪幟所刻試牘膾炙海內一時出門下者皆知名士
且制行端方恥於干謁日以訓子爲務其居有樓樓設
四几書卷筆墨外無他玩好物父子兄弟相爲師友伊

吾之聲寒暑朝夕弗輟平居嘗誡子曰爲人當作金馬
殿中人豈以青衫老耶以故三子昱昂最後先冠軍名
震藝苑猶非岳宗志也卒以屢躓棘闈抑鬱而沒易簣
時猶極稱正希大士兩人家其篤志好學至死不變如
此士林聞訃咸悼惜之所著有聽楓閣集行世

冒袞字无譽起宗仲子襄弟也幼孤啼號躑躅哀感旁人
兄襄鞠育教誨袞亦事兄如父年十五游庠兄盡以先
人遺產畀之辭不受壬辰歲大祲殍殣相屬於道襄竭
產賑恤不足袞傾囊助之曰非好施恐重吾兄憂耳時
與兄同遊者若陳其年王阮亭輩皆引爲忘年交十困
棘闈不售晚年杜門却掃圖史自娛年八十三終子禹

書殷書福書皆稽古力學不愧名闕云殷書別有傳

范亶字祗承邑庠生順治庚寅父是式生亶於白蒲鎮德星里自始遷祖威父至亶十九葉或爲士或爲農或爲清白吏亶性恬退以師友爲性命師事雙虹老人陸舜舊樵黃雲石處士璜若張圮授佘儀曾劉增琳許納陞潘激周眉皆執友也四方賓旅通一刺欣然載酒食過從周空乏焉嚶鳴之風邈焉寡儔矣子捷景頤

吳函字犀年邑廩生詩品清遠奇逸工書楷嘗得松雪謝鮮于伯幾惠震餘琴墨蹟臨摹三月日雖未能親與承旨揖讓言笑亦或的的分其狀貌矣遂以書名家所著有聽松樓詩集子毓貞毓賢俱廩生

石泚字月川博極羣書一覽成誦早補弟子員有才子之目阜之先達如冒巢民吳道川諸人文酒流連視爲畏友泚恂恂訥訥未嘗以賢智先人鍵戶伊吾自若也平居事其父夏宗至孝與弟湘一堂友愛有長枕大被風是時方開宏博科國門當事欲首薦之尋卒子京刻其文集行世

石琮字果育癸巳舉於鄉逾十年謁選人於京師朱邸聞琮名延致同舟聯吟嘉賚甚渥一夕聲滿長安咸比於雪苑之遊聘授惠藩經王敬禮之旋簡修仁令多惠政以捕奸民李梅曉夜蒙霧露歿於官百姓立遺愛碑以誌其思

江源字岷山已卯舉人家故貧夏夜讀書苦蚊蚋納足罌
盎中倦輒以涼水頰面九歲師授孝經不肯鹵莽讀過
必字融句釋而後卽安遂終身體行無數丙辰會試父
漢龍偕之淮浦值水勢湍急溺於河源遑迫投水抱持
洪濤濁浪觀者失色源恍惚睹水中若有赤衣神人掖
出之方太史苞作歌紀其事卷首書曰至孝格天大令
周鼎鑑極器重延課子祖榮祖綬出入公署十二年謹
慎寧謐未嘗干以私大令敬之潛使人橐資入都爲加
先用源聞而詫曰僕肯以功名假人力乎追使者於柴
灣而返之與諸季濤文波澍校經論史爲文讌有生花
軒霽光樓諸集行世後大令歿於臯源市巾車載貌諸

孤歸京師祖榮旣貴顯設位哭奠蓋不忘教澤云雍正
四年發湖廣以知縣用將往而卒邑人情之

石湘字玉香號巢雲以學行世其家幼負竒姿過目不忘
清文敏識下筆數千言轍古切今爛然有第軫材俯仰
之學非其所好也甫冠食餼乙酉已魁一經以策割見
遺主司惜之父璜爲儒林宿素不售而逝兄泚踴厲詞
壇又早歿湘遂絕意進取不復提筆入貢士籍手自排
纘先稿自著畧不愛惜采詩者輒爲殺青行之撫孤姪
京若已子飲食居處必與共暇則陳說道德後京竟以
孝旌湘成之也家僅中貲每傾囊賑嫗舊之乏紓人於
倉卒斥產爲五世祭田敬宗收族內外則焉生平雅仗

如皋縣志 卷十七
名節性剛稜疾惡不與流俗伍以孫鉉馳贈徵仕郎子
二長景義庠生別有傳次立庠生例封徵仕郎有學識
勇於爲善時以爲世濟其美云

盧香字孟升如臯西村人父丹義行盧楨八世孫也香性
嚴毅人皆敬畏之雅耽詩酒工古文辭七歲除夕侍父
側父命對云明日又添一歲香應聲曰今宵且飲三杯
父異之知非凡器也乙酉登賢書司鐸宜興謂諸生曰
居官居鄉務盡其職吾所司者教耳於是校讐課士嚴
立章程撫軍王機以勤敏薦未幾卒於官

吳球字夔鳴孝廉江清之子幼穎異垂髫卽補弟子員鎔
鑄經史著松石山房集傳海內執經問業者數百人受

其陶甄皆成國器姜觀察穎新姜太史任修其函丈都
講也形家言白蒲去水直故文波不振球率鄉耆白上
憲畚插新河凡三折而後去至今科甲鼎盛以歲貢授
沐陽縣訓導時學舍荒蕪土習頹惰乃竭力振興嚴課
士子條教悉本蘇湖張中丞嘉其勞績手書慰獎年八
十有二卒於官郡紳士祖奠百里外哭皆失聲然後去
沈燕字譽處十六受知宛平高公執親喪哀毀骨立服除
不進酒肉與仲弟蒸季弟薰敦詩說禮晨夕怡怡如也
燕高才邃學提唱宗風所爲文清真大雅表裏中和庚
子獲薦不售年五十八以諸生終子懋圻懋坊坊癸酉
副榜

吳文昱字含彩操尚澹素以稽古爲榮執經者屢滿戶外
乙酉主司有國士之目以繕寫者脫蝕儷體句讀置之
訓導吳縣葺校舍中丞屬文昱命日量功庠序一新訓
導解久圯受事者多僑居中丞嘉文昱醇篤檄造宅以
居焉

冒殷書字文足博學多聞每操觚必思駕古人而上之尤
長於詩性最孝食餼臯庠分得膳錢卽罄囊具時物餉
親屢躓棘闈不遇遂寄情任誕有晉人風晚年居無室
廣文張嘯竹與之居乃顏其門曰借廬尋棄去

顧紹祖字衣言英年遊泮馳聲省郡事寡母以孝聞書卷
之外絕無他嗜與里中戚屬結爲起社海內稱起社七

子每相聚角藝紹祖必鈞魂攝魄驚絕一時所居距白
蒲鎮三里紹祖構樓讀書其上書聲晝夜達於河干帆
行檣泊咸習聞之遂名顧家三里樓子鬱鬱不得志以
諸生卒子雲孝廉人驥馴俱成進士

叢方菡字周愛踰冠成進士授德陽令初無所知名會里
中有老生擔簦千里乞鉅公某授文訣期必售某曰若
識里中叢先生乎老生曰識之竊心鄙其文某愕然曰
子揣摩其文三年乃獲遇欲師我而鄙先生子貴耳賤
目者也歸而求之有餘師老生惡歸里謁方菡方菡笑
却之固請以文授之曰初誦必生厭久之生歡喜心乃
得手時也老生如其言未幾果售

江文波字魯溪少爲諸生風範高嚴倜儻有大志篤於交游不屑治生產與吳峻石鍾瑞積學儲寶著書論詩每命酒映月堂與子姪輩衡文課藝懽如也時彰纓之士鮮衣怒馬誇耀里閭文波嫉之因戒諸子以敦厚周慎爲宗子大錫孫岸皆諸生克承先訓

范大謨字禹思父立性嚴整大謨晨昏養志纖微必周慎傷母劉早世每日晨起必至母卧所拂拭衽席瞻拜涕泣孺慕之誠老而彌篤謨嗜學藏書數十乘昕夕吟諷丹鉛不去手取天運地輿帝統禮樂名物一切見於載籍者博究精研採華擷實徵事屬文閱三十寒暑十易稿成萌媵賞交一百三十卷江浦劉大山宜興儲六雅

上海曹諤庭金壇王罕皆吝賞不置嘆爲一代良史才生平不妄交不苟取後輩稍軼規矩輒正色訓誨撫友人藐孤自孩抱至成立如骨肉然姻戚家中落母子蕩析割宅子之族有爲節婦後而艱於嗣者捐百金產資之由明經選授金壇學博設立課程提倡古學三載修葺學宮成告休歸里年七十有九具衣冠正襟端坐而逝子二棠乘醇謹有父風孫曾輝甲戌進士

范大呂字聖音性肫誠從不妄發一言由廩貢爲鎮江府訓導學使者張廷璐燕見呼范先生謂左右曰如此君便能歸人於至和示人於大樸

叢長茂字松如世居平田爲郡庠生行住坐卧必手一編

如皋縣志 卷十一
至老不輟癸巳督學胡潤延淮海知名士校詩入獻長
茂與焉一日步出驄馬里有鬪於塗者觸之傷齒市人
皆怒長茂曰此誤也舍之而去至今平田莊戶有揖攘
之風里多通明之士其遺教也

薛彬字含芬爲老明經居白蒲鎮之薛家橋其地水竹甚
富舊爲宗人巨源之園彬割其餘爲圃觴詠於中少時
爲冒巢民所知晚年斧藻詩林亦江臯之碩果也

黃克業字文勳生平孜孜淑淑未嘗失言色業制舉辦香
文止困諸生四十年乾隆丙辰歲六十有二欣然束書
笈就省試旣抵白下病疴恍惚入鍾山見江月初升有
玉兔雙銜青桂投懷中病灑然愈是科竟魁鄉薦同榜

鄧宏文已卯生者也釋褐後攜孤孫客揚州者十年謁
選得萊蕪令改池州府教授將之任夢一人披苕帶藻
歌曰從彭咸之所居心惡之已又歎曰少陵牛肉白酒
供奉騎鯨渡月螻蟻何親魚鼈何寃一夕墮水死所著
詩古文詞風骨高潔選家以方岑嘉州云

余鍾岱字青來氣象澁潔爲文探本根不以譁囂爲美家
甚富而青鞋布襪與寒素不殊每與人晤言雖溽暑時
灑然如秋也

劉行健字自強性剛方嗜學髫髻時卽能文名噪甚執親
喪未嘗見齒撫孤姪如已子雅尙名教力挽頽風餼於
庠三十年

陳天位字瞻巖讀書有精思苦心造幽渺三十年遂以舉業專家酷愛孫月峯楊貞復二先生稿揣摩神肖臯邑經生多造門請業到今黨塾寶貴其文轉相傳寫爲枕中秘課焉

李宗紘字絲綸明孝廉猶龍孫乾隆丙辰歲貢少負大志矜然諾遇事敢言讀書期實用入棘闈十三次老而閉戶益肆力於古文辭著有老言存草貢足軒九我廬詩刻行世凡忠孝節義之事必極爲揄揚乾隆七年以其撰述由學詳呈學憲劉吳龍極賞之與兄宗紳友于之愛老而彌篤嘗題一聯曰貧期兒輩好老覺弟兄親卒年八十一歲子四本昌天培晁俱列博士弟子

石璣字玉溪內行修束少有英稱康熙戊寅拔貢需次知縣親老不仕暇多吟撰日積成帙學使者張榕端并梓行之又著小學辨論書未竟而逝子汝錕續成焉

吳淑閩字幔亭父素貴以家法相教授十歲應童子試受知於江陵胡念蒿十六食餼四十貢入太學爲人敦倫紀尙氣誼不入公門設教授徒著錄者悉成名去撰四書理解藏於家

劉鍾悅字傳巖祖焮爲本省都憲未四十卽抽簪林下與吳陵陸舜同里范是式數晨夕常抱悅置膝上使哦詩卽朗吟數首時才三歲弱冠籍諸生父增琳使從長者游曰道固無孤德必有鄰悅遂練達世務爲士方領以

明經終

朱學潛字用九號蔚亭農部式屏長子幼嗜學年十五補
博士弟子員學使張公泰交有空羣之目屢試棘闈未
售以例入成均候銓儒學司訓性至孝樸質不斷嘗從
父任遊京師父膺絲綸重任引疾乞休沐閣臣未允令
潛入直代辦數月無不得當其端方醇篤不愧當代可
知至訓家嚴整與人和厚謹小慎微抑抑有古君子風
皆庭訓也生平著作甚夥有中孚堂會業初編種松園
詩集十卷行世子永松次永桐孫崇仁皆蜚聲庠序恂
恂雅飭僉以爲世德之報云

黃彝字景修赤岸鄉人意清冷靜邃籍諸生三十年不以
榮利自黜與范燕桂與宗勺甘咀芳陶詠文酒間學博
顧瞻盧常曰對黃生彝輒令人神明澡雪

陳以松字公木修髯羸幹雅喜清譚工文善書擬宋人小
調亦復絕倒家甚貧詠歌樂志不屑一切嘗負母盤舞
庭中母握松鬚作咳而名之之狀父耄甚寢食衣履非
松不爰後以戊午副貢入成均甲子冬

上臨幸鎖院松迎

篇於門賜六經四子書寓次語友人曰書生得覲
臨光殊遇也何必擬魏科哉遂策蹇歸卒於家

朱學演字永思幼承父廷宮之訓恭謹儉樸有長者風雖
盛暑中與童穉相見未嘗不具衣冠幼而好學至老彌

篤先是祖鳳台建賢宮東西二坊歲久將頽學演率弟
濂等葺而丹雘之費亦不貲三薦不遇老於明經

吳實栗字楷庭性樸魯鑽研文律用志不分遂長於制舉
藝與里中同志結起社聚頭角藝風流宏長社友咸取
科第去實栗老為里塾師日夕排纂不倦以明經終

沈領字驪珠工詩古文詞雅度善飲尤精於行楷入松雪
思白之室寥落不得志以明經歿斷紈零楮莫不珍惜
之

蘇鼎邵字象源為諸生餼於庠閉戶潛修六經子史手錄
數過嗜學晚年不輟以明經終同胞七人其三日鼎鬱
由廩生舉康熙癸巳鄉薦任黃安知縣生平友愛澁然

無營焉

陸燕喜字游祉幼穎異有神童之目試於縣縣令李君奇
其文拔冠童子軍遂入邑庠時年十四未聘同邑老儒
吳世標亦受知於李君世標有女曰霽彩李君為執柯
焉燕喜好學不問生人產以故貧乏霽彩讀書通大意
與燕喜為閨中文友又長於持家家以興起

吳毓貞字坤安弟毓賢字鹿書皆廩膳生父函一門師友
高挹羣言里中有三蘇之目貞負不羈才風流宏長著
述等身惜早逝賢瀟灑出塵博極往籍工書善詩旁通
篆刻遍遊宇內著類纂四十八卷蜀遊豫遊詩記諸書
顧茂對字毓仁號禮園幼穎異因質羸未遂讀書志教子

義方長鎔登賢書次鏊鋼鑿鏡俱有聲黌序孫三餘選
貢三秀副貢以次馳驅

皇路有政績世業書香天性長厚卽夙願未酬不得之於身必
得之後人擬之漢萬石宋三槐殆無愧矣

姜恭壽字靜宰號香巖才氣奔放不可控抑詩文橫絕一
世工篆善畫補博士弟子登辛酉賢書五試春官不第
游廣陵賦詩爲文自娛樂灑筆數千言立就時作梅花
一兩幅識者爭購致之佐雷督學校士公正無私脩邑
志體例謹嚴晚年病耳五十有二歲以疾終遺命殮以
華巖經一卷古玉二枚所著有周易轍八卷毛詩編年
六卷古文四卷詩二十卷瓦叩錄時文一百二十篇

顧經字麟書廩膳生嗜讀工制藝居白蒲鎮教授生徒出
其門者皆知名士屢躡棘闈至老猶預賓興子元字伯
良幼穎異承家學能文弱冠遊庠試輒冠軍旋以廩膳
生膺雍正己酉科選拔

廷試優等分發陝西以知縣用因素有羸疾擬告歸朝士皆勸
駕將就道忽以疾卒於長安客舍竟未得展其用公卿
間咸惜之

潘世芳字熙春雍正甲辰登賢書官休寧教諭講學論文
頗有法度

王化久字湄白號槐村雍正甲辰舉人會試中明通榜授
青浦教諭歷署縣篆裁浮糧修學宮免雜稅賑饑荒所

至治績卓卓主淮南書院成就人材甚衆著有春秋直解學庸講義若干卷卒年八十有二

朱大有字子年號摩訶山農邑諸生爲文蹊徑獨闢工書法直入晉人之室

范伸字雨蟄號松槃早歲遊庠流覽經史及歷代詩古文辭輒手自丹黃細加考訂善記誦有援引本末源流無遺誤尤精旨左多創解一時名流莫不心折

吳景新字賡韻號磨軒廩膳生及貢期以足疾廢肆力稽古上下數千百年識力深沉意象高曠宋曾魯公季子肇隨父如臯任讀書中禪寺中築齋隱玉後爲兩香菴齋遂湮沒重修時吳儀鳳等擬額未定景新題額宋曾

文昭公讀書處作詩四章徵一時名流詩勒石垂後景前賢仰芳躅也著有眼前事注釋三十二卷潤鴻堂詩十卷子應召文學號稱淹博精於天文圖攷

冒與恒字聖基增廣生事親孝友于兄弟建祠修譜睦族敬宗遇瘡河賑饑修葺文廟經理義學邑令皆委任焉服儒服冠儒冠著誠去僞視雕繪文藻剽竊聲華者加一等矣在學六十九年九十有四歲卒

江濤字有聲號秋觀候選州司馬工詩善醫好施濟有隱德子七大銳大鐘大鍵其有文名者

冒春榮字寒山號甚原廣交遊每三年大比赴白下集江南北知名士數百人把酒論文決勝負得鼎甲者十餘

如皋縣志 卷十一
輩如上元秦大士蕪湖韋謙恒皆其友也賦性恬澹絕意功名惟以著述爲樂主書院修志乘操選政手無停披口不絕吟家徒四壁立晏如也

范景頤字漱芳號迦陵邑廩生博學淹貫而篤于孝友工詩與兄越山齊名客揚州同秦澗泉王孟亭唱和有瓠尊集刻邑侯鄭州尊王先後延修郡邑志有良史之目著孝經集註論語序說子光奎文學生能詩頗有父風姜文載字命車號西堤天姿雋上年未冠淹貫經史好爲詩嗜畫工書善吹洞簫不喜舉子業偶降格爲時文補博士弟子見兄恭壽詩放筆淋漓一瀉千里獨落想超妙惜墨如金異曲同工人稱二陸畫無師承臻神品生

半濡墨染毫皆飄飄有凌雲氣享年不永三十而沒

謫仙與

范遂字密居性恬靜好爲詩從新城王大司寇遊詩益進海內知名士皆傾服以中翰理河務年餘歸里著有鳳唳齋霜妍集行世

方基字克成工帖括善詩古文辭棘闈屢躋以食餼終子儉博士弟子員孫舉力學未遇人咸惜之

朱學陽字涵一天姿穎異爲諸生試輒壓儕偶康熙甲辰應省試同考官當塗令林縉以房首薦主司已列魁選擊節歎賞不置填榜時卷失所在遍尋不得自是遂無意科第捐授州同知性孝友父沒弟濂甫五齡延師課

如皋縣志 卷十一
讀俾成立督學張廷璐以義方代父額贈之邑中創建
書院立育嬰堂置義塚悉捐貲襄盛舉年八十一卒子
樞附貢生相增廣生

范棠字液舟號棣園大謨子幼攻舉子業根柢盤深登古
人堂與掇科第宜如拾芥己酉入闈薦而不售遂絕意
功名日流覽經史旁及諸子百家賦詩爲文發摠性情
恬如也生平厚重簡默動必以禮所交游皆四方知名
士有遺文藏於家

范樸字素含早歲游庠食餼爲文博大精深一時老宿咸
珍賞之丙午鄉闈已入彀旋因策泛見黜自是絕意進
取以諸生終家豐饒又爲貴公子而服食如寒賤自

號曰山民有以也

冒廷驥字攀雲號江村性放達日飲酒賦詩與朋輩角技
譁呼論文於先正源流本末皆通貫士林奉爲準繩廩
貢生候選訓導子嶽博士弟子能詩著有蒙泉集

范安素字位公號受菴入學食餼爲名諸生孝友性成與
人處退然若不勝及臨事決疑則侃侃不阿非有得於
中何以能此

石頤字正也號養齋性曠達四海名山川游歷殆盡遇俗
人輒加白眼爲文自出機杼羞雷同工書畫能詩偶一
吟咏儵然出塵不得志於時以增貢生考授州佐

石需字待也號退菴風格秀逸喜爲詩善書遨遊四方足

跡所至率多題詠

范棟字堯雲號浦雲年十六補博士弟子員肆力經史博通百家為文有根柢人謂取科第指顧問事耳惜體羸善病每大北不與試生平孝友處鄉黨排難解紛無不折服

陸景澄字書城州同効力南河有幹濟才補高郵主簿任丹陽縣丞皆有治績生平愛古嗜學貫通經史書宗率更詩法盛唐與當代名流結社聯吟莫不推服卒年八十有三子喆周

鄧鴻文字東聚號廬雲由廩膳生中式丙辰科舉人丁巳壬戌會試兩中明通榜揀發南河以沿河州縣及同知

通判補用其署淮安府山清中河通判值

聖駕南巡恭獻迎

鑾詩章荷蒙

聖覽亦可謂千古奇遇矣生平詩歌流傳者不少似此得邀

睿鑒榮莫大焉詩有云末吏奔馳覲耿光當亦喜出望外者也

沈懋坊字樞萬號臨臯一號印原性孝友終身承父教無違事母先意承志兄懋圻早世撫其遺孤三孫一婚娶皆及期前後相繼病亡喪葬如禮以已曾孫宜榮為其兄孫容孚嗣自幼才識過人為文汪洋浩瀚下筆數千言立就由庚午恩貢應順天癸酉科鄉試中副車選潛山縣教諭與諸生日以道義相砥礪士風丕振主敬敦

書院崇朴黜浮肄業其間者人敦品誼學有根柢歸里後論文談道爲後進楷模年八十無病而終

范元直字補五號礪溪授州司馬不樂仕進日與胡香山許納陞姜穎新陸國慶諸名流歌詠倡酬不倦國慶家中落以六鶴齋居之其他好義類是季子偁體羸弱屏絕塵氛好讀書意致瀟灑三徑松菊恬如也

高繼祖字承瞻號梅溪少力學與史鳴臯錢標林輩相切廟以國子生應順天鄉試不售初筮仕唯寧主簿旋任盱眙縣丞地臨大河相機宜修堤防幹練敏捷出入意表以功陞天長縣令興利剔弊多善政稍暇卽把酒賦詩引名流唱酬往往至夜分不倦年老歸里以疾卒於

家六十有五歲門人伊齡阿刻梅溪遺集

冒念祖字聿修號思堂超曠拔俗不喜帖括家多藏書日繙閱不倦與到賦詩多名句好客客到倒屣迎之揮塵清談雅有晉人風度年八十三卒著倩石山房詩稿行世

朱爲綱字苙方號璞園性聰睿讀書過目不忘爲文沈酣經史諸生時試輒冠軍屢困南北兩闈以功名連遭與弟曉嵐日夕桐蔭書屋率子姪輩臯比談經上下古今觴詠無虛日遠近知名士皆從之遊一經指授遂脫恒蹊如陳劔門以姻親受業果以乙酉掇巍科子兆棊廩生爲文有奇氣屢薦不售兆杰兆柟庠生兆棠監生兆

碁子蘭孫廩貢生沈院歲科連試皆第一蓋家學淵源
有自也

鄭選字繪獻號桂田爲文幽渺似羅儀部設名理終日無
倦容析疑義窮源竟委與人交以心糾謬繩愆不徒詩
酒唱酬而已也惜天不假年三十有三卒子韶副貢生
鄭迪字澤南號祁生貌清癯多病工韻語善畫好賓客四
方名流及同里諸君子宴集花前月下分韻賦詩語必
驚人貢成均以羸疾不與試年三十有六卒子阮上舍
生嶠州司馬疑博士弟子員

余漢字天章號楷園丰儀朗潤美鬚髯工詩於所歷佳山
水往往題詠其間年過六旬境益苦心益恬澹常嘯歌

不輟

吳玉字藍田號磨夫邑增生植品端方耄而好學享壽八
十有八少岐嶷王母陳保抱撫摩謂是兒當貴顯讀書
穎悟絕倫見父母謀生勞瘁益刻苦自勵上下古今爲
文經經緯史博大精深而迤邐棘闈屢薦不售一時從
游諸生得其緒論往往掇取科名如操左券子鼎新由
拔貢歷官甘肅涼州府知府署西寧寧夏甘涼道篆鼎
祚歷官廣西永康西隆上思州知州推陞浙江紹興府
同知調署杭州府東塘海防同知俱不外清慎勤三字
之訓晚年課諸孫常自手一編吟咏弗輟蓋樂此不疲
也生平著作不以示人視沽名弋譽者加一等矣

劉漢詔係宋理宗時以明經爲揚子令劉基十六世孫也
自基以下世世明經相續歷十五世得明經凡二十七
人詔亦明經端本善則爲子姪講學於禮記文王世子
書君陳詩蓼莪棠棣諸篇每三致意焉至於好義急難
又其餘也年八十有八

恩賜粟帛

吳士藹字肅然增廣生善書學有根柢出其門者皆有所
成就子三峯蜚聲庠序
繆象鑾字天衢早歲遊庠食餼以貢選荆溪訓導任宜興
教諭諸生荷裁成敦品力學士習蒸蒸日上後爲翰林
院孔目以疾歸

陳彭字博菴品端學博困諸生年八十以歲貢選授亳州
司訓

劉宏謨字濬發邑庠生善詩古文辭兼工書法名噪甚生
平不苟言笑學博任之鏞目爲端士

蔡鸞字健菴讀書刻苦爲文凌奧獨開乾隆戊午登鄉薦
未幾卒子丕顯太學生

冒可久字德中號堅體上舍生嶽崎磊落視俗儒拘學相
去不啻霄壤爲文鬱勃盤曲傲兀自恣洵足辟易千人
而卒不遇字法元常逸少神妙獨得有倩石山房文集
二卷卒年四十有一

范昶字旭東號華阿嗜學工文屢試棘闈不售益傲兀見

異人讀異書此外無當意者卒年六十有七

顧恒學字立方白蒲鎮人弱冠入庠有文名由歲貢選滁
州訓導未幾丁母憂服闋補安慶府懷寧訓導勸課諸
生以立品爲先論文有法度去後士林多思慕之

姜會照字昌鹿號南園年少入泮有文名中辛酉副車選
蕪湖教諭陶冶諸生以胡安定經義治事爲法故一時
士習蒸蒸日上後任四川夔州府奉節縣令尙狷介與
郡守齟齬誣陷罷職備歷坎壈獨以詩文自娛與繼配
盧擘箋唱和夫婦若友生同年荆五峯憐其困乏解囊
與千金固不受爲置田百畝贖問耕草廬居之日夕吟
咏其中晏如也卒年七十有九

姜掄元字萬長號鳳橋廩膳生天姿超卓博極羣書書法
遒勁工詩賦乾隆辛未

聖駕南巡召試二等

賜綵緞荷包應省試屢困躓鬱抑以卒命矣夫

吳江字湄川號眉傳早歲遊庠食餼督學張愛其文謂如
新雨梧桐清氣欲滴肄業鍾山書院名噪一時鄉闈屢
薦不售以明經終卒年八十子正笏孫羅酉庠生希濂
恩貢生

吳繼元字默存號李亭幼明敏年未弱冠補博士弟子員
嗜酒工詩爲文清曠灑脫翛然出塵吳氏五彪蒲中十
子此其一也中辛酉科順天舉人授浙江富陽縣知縣

丁卯充同考官所取皆一時知名士後任青田縣令卒
子廷琳上舍華庚辰登賢書充國史館纂修詠庠生
吳經元字引臯號漁門居邑白蒲幼穎異補博士弟子屢
困棘闈考授州倅游京師聲譽籍甚山左阿撫軍延置
幕府旋隨節制蜀省凡劄奏有關軍國大務輒借籌贊
畫奮筆千言靡不得當雖古記室叅軍無以過之尤工
詩賦書畫時巨公名卿咸讐伏傾倒晚年家居對山樓
不復作仕進想故雖銓不就其於榮利泊如也年八十
有七終著漁門遊草十二卷

汪德大字容夫號栢山潛心理學深窺窈奧爲諸生數十
年文壇雄踞超軼前後鄉試終不遇四方英俊執經問
字者屢滿戶外稱爲栢山先生
祝震字篋竹性至孝父沒恭厥兄兄旋歿率三弟攻苦力
學皆列校序家寒素敦品誦教授生徒多所成就爲文
詞氣充沛不似舊唐小言受知郡侯董拔冠一軍補弟
子真性困場屋未遇而卒

江大鏡字筆峯號樵所弱冠食餼爲名諸生工詩古文詞
與弟大鐘大鍵相切劘人稱三鳳著作甚富卒年五十
江大鍵字約船號鈞鈐子穎悟好學弱冠遊庠與兄大鏡
齊名人稱二陸省試輒困躓赴都肄業太學天下文章
聚於此學日益進博通淹貫天文地理音學算法皆有
窺尋工詩古文辭郡王延作

萬壽樂章達

聖聽名噪都

下應順天鄉試薦不售鬱抑以歸大中丞畢撫豫
聘纂中州志主書院生徒經指授者率掇巍科登
顯仕鍵獨以明經老時修邑乘未歲事而卒年七十有
九著詩世次四卷籌算我法十二卷西軒南村集各若
千卷子茶善詩能承其家學云

冒國柱字緇塵號芥園四齡受書八歲能文十三列邑庠
有神童之目後雖數奇不遇而逸志豪情曾不稍減興
酣落筆滿紙雲煙酒後詩歌益傲岸恣肆壽躋耄耋猶
往往握管飛舞與三五少年爭塗抹於花前月下矍鑠
哉是翁也賦詩爲文興亦豪矣著書數十卷藏於家時

延修邑乘未事而卒以所有邑乘備採一冊及增改鄭
志三十二卷旁搜博引積數十年苦心俱堪采錄於邑
志大爲有功云

陳松字木長號石橋少貧不能就傅十五歲發奮讀書才
氣穎異范實齋召之來學訓誨維殷弱冠遊庠試輒歷
其儕輩中乾隆丁卯舉人與其師實齋同榜一時傳爲
美談充歲安宮教習選湖南桂陽令改陝西富平縣先
是富平趙爲如臯令松蒙賞鑒至卽厚恤其家以報知
已年方壯盛正可大展猷爲忽念祖父墳墓爲祭掃計
又憶少時曾寄食伯父士宏家宜報其德遂歸里後復
入都赴銓曹朋輩多所唱和補滇南新平令卒於官署

沈熙純字泰字號緝人一號緝子四齡入塾十歲能文嘗論舉子業當標新領異無取苟同年十七隨父抵京得讀監刻諸經史及頒發中藏秘書學益博識益宏中順天癸酉舉人當是時名噪都下五試禮闈竟未遇充昭忠祠傳文館副纂修書成議敘一等以知縣用方屆銓期忽以病卒於繁峙門人虔禮寶臨視含殮時年三十有八

蔣大本字立之號文峯才鋒英敏倣儻超常爲文獨闢蠶叢陳言務去遊京師肄業成均每一拈筆名公鉅卿輒珍賞之壬申闈卷業已擬元旋因策語失檢抑置副車後由教習授州司馬以病歸長才未展亦可惜也

吳合綸字德岩以諸生終博學工詩兼精舉子業猶子廷璫璫之子世勳淹貫經史爲文入古人堂奧先後登賢書皆綸所成就蓋淵源有自云

吳容字右肩白蒲鎮人弱冠食餼爲諸生領袖工書法作文滔滔汨汨如萬斛泉源不擇地湧出海內知名士皆樂與之遊惜屢躓棘闈資志而沒子逢春乾隆甲午副榜睢寧教諭廷璫已酉科舉人孫世勳嘉慶辛酉舉人盧庚字鶴巢號白山苦志讀書常永夜不寐入庠第一學政劉異其文疑爲夙構面試文更佳益嘆賞不置庚午已擬元適得疾三場未入自此絕意功名寄情山水放達不羈子履春邑庠生

王愷字又凝號沒菴性恬退不求仕進工詩善醫日與名公鉅卿遊足跡遍天下工書得鍾王家法貌癯而神清平生尙義常出囊中金爲崇川某贖罪卒年六十九子二臣香俱邑庠生臣工書有文名惜早年逝

鄭有奕字庸萬號蓉灣候選縣尉抗心希古討論典籍多所發明註離騷爲人伉直無矯飾年七十三卒子二曰豫曰泰泰壽州知州

冒訓字伊言號集堂幼穎異讀書數行下補博士弟子貢成均爲文輒冠其曹大司成觀保器重之甲子乙酉兩薦未售遂絕意科名以詩古文自娛有集堂詩草年八十猶吟詠弗輟子方華字白民號柏銘承父教學有根

祇由辛卯舉人入挑分發浙江知麗水縣事興利剔弊戴月披星以勤勞卒於官孫師培陝西澄城縣典史朱文杏字芳苑號錦莊廩膳生文章豪邁屢困棘闈年七十卒

沈志鯤字北池弱冠補博士弟子員食餼強記博聞以明經終

馬正煌字凌霄號晴峯天姿俊爽應童子試縣州院皆第一食餼爲名諸生朋輩樽酒論文醉後往往以元自命屢躋棘闈遇亦蹇矣天又奪其年三十有八歲卒惜哉徐汝龍字靖士廩膳生善屬文縱橫排異名噪一時屢躋棘闈賚志以沒

沈儋字力人少孤事母孝讀書淹博能文章書法工妙晚號灌花老人年八十卒著瘦夫詩鈔四卷

黃元燦字雲圃號瑩川性情高逸不染俗氛事親孝親沒廬墓側築古春園種竹栽花高低掩映於此間頗得佳趣時誨其後人讀聖賢有用書庶幾乎知道者矣子振雅有父風

郭倫字軼美弱冠游庠屢試棘闈不遇理學湛深頗窺宋五子堂戶著周易集解四書講義爲人耿介不染俗氛蓋好學篤行者也

張抒字素田志芳子幼穎異讀書號淹博文章得先正矩獲應童子試冠其曹入泮文名噪甚雞羣鶴立人謂取

科第如反掌耳使天假之年學問事業未可量也無何以疾卒年三十三有子三人長顏次溶遺腹生灝顏知薊州溶湖北襄陽府知府灝署長沙縣縣丞皆抒室唐教養之功云

童兆鰲字雨田廩膳生文追先正於王唐家法獨有窺尋范麟字賡文秉姿穎異爲文敏捷數千言立就海內知名士皆樂與游由貢生歷任貴州施秉四川梁山縣令高謨字禹傳號雨船名諸生善奕工書詩愛陶杜遇名流游勝地興酣落筆數十章頃刻立就家貧茅屋數椽蔬食菜羹儵然自得

高椿號云莊考授主簿幼失怙母孀苦節乾隆五年請

旌建坊刻母愁叢集遺稿行世篤友于兄沒訓猶子如子生
平工吟咏與一時名流爲耆英會樽酒論文娓娓不倦
云子原峻馨壙衛俱遊庠序峻著有史摘二十卷

朱昇字荊州號謙菴寡言笑慎交遊讀書博通今古爲文
峭削試輒不利援例授主簿亦不樂仕進惟日呼管城
子墨卿楮先生輩酣嬉淋漓爲樂至恤災助賑周急濟
貧尤汲汲不遑子洪達布政司經歷嗣孫章立刑部司
獄

陳在庚字吉午號劍門乙酉舉人家貧母孀且老資館穀
養親依膝下不忍赴禮闈母催促再三公車北上考授
中書中明通榜忽以疾卒於京人爲扼腕子佩霞英敏

好學亦卒

陳繹字我定歲貢生早歲遊庠食餼以攻舉子業與邑中
史鳴臯范曾輝輩結社爲文根柢六經出入史漢卓然
自成一家言一時老宿咸心折焉惜終其身未獲一第
年八十餘猶吟咏弗輟可謂樂此不疲者矣

陳拔字冠英號茹亭附貢生刻志讀書爲文峭削屢躋棘
闈以明經終

陳典字書源號在山乙酉科舉人當塗縣訓導與諸生講
學論文卒於署學政徐贈句云生前孝弟爲師範死後
文章作史官其生平品學可概見

陳皆人字西開號義耕附貢生世居東鄉之十家甸守先

如皋縣志 卷十七
人遺訓孝友敦厚爲文根柢經籍不趨時艷屢困棘闈
遂厭科舉構別墅蒔花種竹以自娛猶潛心義理之學
教子永康極嚴早歲遊庠貢成均乾隆三十三年歲大
飢爲鄉人倡首捐賑已出穀百餘石鄰里德之

石中瑤字汝佩號樛村增廣生天性孝友學問深醇鍵戶
授徒闡明經義不苟爲炳炳烺烺年八十二而終子二
長文甲寅舉人次青邑庠生有文名

黃國袍字澹峯潛心古學不以帖括見長工書法長幘寸
箋人競寶焉工詩有塹溪遺稿其孫理爲校刻之
薛開字展也號木菴諸生書法工妙擅詩名與冒巢民友
善

黃振字瘦石負奇氣所爲文宗工大匠莫不珍賞之築斜
陽館集賓客放情詩酒慷慨悲歌似燕趙間士

郭健字粹中增廣生員爲文跌宕淋漓英姿颯爽兼工詩
與一時名流相倡和聲震江南北屢躋棘闈年五十六
卒人咸惜之

吳廷燮字梅原美丰度八歲能詩成童補博士弟子員屢
困省闈入成均應順天鄉試文典贍薦而不售以疾歸
卒前於乾隆辛丑恭逢

聖駕南巡迎

鑾獻賦有迎

鑾集楓香閣詩古文集若干卷

姜展字東甫號澹餘太史任修孫孝廉恭壽子也少穎異好討論風騷不喜帖括父責之勉強爲時文受知督學李鶴峯補博士弟子肄業梅花書院王文治鮑之鍾輩皆推爲畏友應順天鄉試屢薦不售歸罹錮疾旋丁內艱復喪其偶坎壈纏身屏迹荒江老屋中日譚論詩古文不倦可謂安貧樂道者矣著書數種藏於家

林李工詩精書法善醫所知交皆當代名公卿足跡遍天下歿於金陵上元縣丞張珉殯焉李字九標號鐵簫嘗得鐵簫於市因以自號云

呂琳字天池少孤祖母劉撫養成立聰穎過人爲范實齋高弟以廩貢肄業成均所作詩古文辭宗工大匠皆嘆

賞名震都下旋以疾卒於客邸子榮年少遊庠亦卒

喬林字翰園號西墅一號墨莊性嗜古潛心字學自周秦以來篆隸源流考覈精審士大夫家存三代古器鼎彝敦鬲文字不可辨識者咸能攷據而證明之作字淳古渾勁得籀斯遺法遇佳山水往往攬勝探奇旬日忘返率意吟咏瀟灑出塵有篆隸滙編墨莊印譜金石萃言及詩稿若干卷藏於家子普以優貢授霍山訓導

沙冠臯字南馨號蘭圃幼穎敏讀書過目不忘及長淹貫經史詩古文辭無不工剖析經義多發前人所未發帖括偶爲之非所樂也中辛卯科副榜子景濂庠生

石萬資號春鵠天姿穎異弱冠遊庠善詩古文辭肄業梅

花書院篇章傳播名震江南北鄉試屢薦未售以附貢終才而不遇亦可慨已

孔傳祖字宗道號仰山國子生

至聖先師六十八代孫也言笑不苟好涉獵經史工詩晚年學醫以濟世爲心

宗孔思字杏原邑庠生工詩善鼓琴有彈蕉館當風日晴霽鼓歌其中有飄然出塵之想嘗得古琴病革時猶摩挲不置

范駒字昂千號藿田曾輝子也幼聰慧絕倫襁褓中口授古歌行一過不忘稍長補博士弟子員制義固循循有規矩而於詩古文辭尤精妙爲老師宿儒所畏憚乾隆

四十九年

純皇帝南巡召試二等戊午闈卷已入彀旋因三場微疵擯斥已酉膺拔萃科方期顯達得展經猷竟以體羸善病卒才而不壽人共惜之

冒陵字武漁邑庠生博學爲文遵先正矩獲家素貧藉脩脯養親教授生徒循循善誘出其門者皆得緒餘以底於有成卒之日人共咨嗟歎惜焉

陳柏字庭植性聰敏好學弱冠遊庠旋食餼文名噪甚乾隆丁酉拔貢生應己亥順天鄉試登賢書四庫館校錄議敘知縣分發江西授臨江府新淦縣令蒞任後養士恤民爲政識大體丁母憂歸以疾卒年四十有八

江千字片石貌陋好苦吟郊寒島瘦天性然也太史袁枚
會賓客於隨園以江北詩人目之年老不得博一第以
明經終

管濤字雲度號壘曰廩貢生候選訓導署六合縣教諭少
負異才有詩名好集唐宋句如無縫天衣所交多知名
士著有鋤金園詩集

石峯字嵩高號太室性耿介不苟取與從遊范實齋補博
士弟子有文名嗜麟經著春秋圖考子臺辛酉科舉人
姜今熙字安十號雲籬幼穎異讀書過目不忘爲文汪洋
灑瀚應京兆試爲陸耳山初頤園兩先生房薦工詩兼
書畫直窺古人與交海內名流爭購求之遊京師廿餘

年屢困棘闈充四庫館膳錄議叙州同知旋以疾卒士
林悼焉年四十三著有就正集書鏡格物叢言若干卷
宗兆寧字靜載一字篠塘邑增生少有大志嗜學工詩未
弱冠補博士弟子員凡校試無不超列前茅面加獎勵
因益精勤日夜不輟遂成羸疾每遇省試輒以病不能
與卽力疾入棘闈又復屢遭屈蹟鬱鬱不得志其平生
尤重品槩篤於孝友閉戶不與外事嘗作補拙錄數千
言其所探討而詳究者罔非勵文行益身心之學集未
成而身已殞矣卒年三十九歲迄今士林猶重悼之

鄭鸞字鳴五號枳園工部景誠子也善書爲文清新俊逸
迴拔時流以諸生應省試再躋肄業太學刻苦讀書博

通今古順天鄉試期已屆忽遘疾輒咄嗟自語遂不起
年三十有三

黃寧字履安邑諸生天姿穎異試輒冠軍嘗偕友人讀書
城南僧舍雖祁寒暑雨篝燈熒熒連旦不倦後以力學
致疾卒著有桐蔭山房詩若干卷阮大中丞淮海英靈
集採入其詩以悼之

石荃字湘蘅號渚亭農部樊山曾孫早歲遊庠爲文超拔
兼工詩賦不幸短命年二十有二卒

范輅字以賓號于山幼穎異博涉羣書長遊伯實齋之門
實齋故宿儒門下士以百數尤目輅爲遠到器果以甲
乙聯捷成進士名動公卿間咸以未與館選爲憾與同

年今大司馬長牧菴少司寇戴可亭晨夕聚首互相切
劘爲文原本經術不求炳炳琅琅一時膾炙人口謁選
得安徽銅陵令至卽除積弊清漕務吏民畏服訟獄尤
多平反撫軍書亟稱其能銅邑向少科名輅與學師定
課程獎優等助膏火是歲獲售者三人旋丁外艱歸服
闋以母老乞終養曲盡孝道暇時與知己論文娓娓若
諸生時後進多所成就母歿奉遺命赴部需次補四川
長寧令值大軍初竣籌辦事宜勞勩致疾而逝文章經
濟未竟其用聞者胥扼腕焉配朱氏事舅姑孝持家勤
儉有賢淑聲

王臣字若水號心泉邑庠生援例入北闈薦而未售高制

軍延入師席禮意有加平生兼工書法逝時猶臨魯公
爭座位稿數頁神氣逼真著有心泉詩抄四卷

朱洪寅字吟軒號蟬仙性耿介耻爲脂韋態嘗慨然曰士
君子當以立身爲先文采斐然徒尙浮靡無當也孔子
云行已有耻吾終身以之故其平生懷清履潔窮而益
堅教授鄉里成就者數十雖嚴以自守而循循善誘饒
有霽月光風之度幼負大志爲文肆力于古不屑屑揣
摹家顧數竒屢薦不售卒以名諸生老論者惜之著有
襟山閣詩草襟山閣詩餘行世子三能讀父書章俊章
息章令俱邑庠生

許輝祖字鳳千號桐香邑廩生能文章就正宋雲溪學師

命子從學數年卽獲雋兼工書法修縣志聘王分校尋
逝士林悼之

李閻字悅堂性至孝籍館穀以奉母簞瓢屢空宴如也著
有拙存詩稿見琅五藏珍

賈六典字建邦幼失怙母劉苦志守節教子成名載邑志
六典孝事孀母友愛諸弟讀書敦氣誼試輒冠軍庚子
房薦不售食餼二十餘年貢成均尋卒年七十有五子
鴻邑諸生

黃經字濟叔善山水仿倪黃遺意究心篆籀得秦漢法周
櫟園侍郎嘗稱其書畫品兼神逸緣姓名與人同誤置
非所究雪後名震公卿以書畫日致千金旋卽分友散

去客死延陵黃岡杜茶村不遠千里來弔詩以哭之著
六書定論三十卷藝苑微言四卷品畫塵談二卷

程化鶚字時揚號晴臯少時篤志經史卽以三省四箴爲
心性之學弱冠補博士弟子員屢薦不售視科名爲身
外緣憤樂相循耄耋不倦其講論一以端慤周慎爲首
務時恐一言未當於心必日記之以自考教授生徒戶
外之屢常滿遊其門者無不循循矩矱望而知爲晴臯
弟子也平生無矜言無忤色與兄培甫敦孝弟勵言行
臯之人素推品誼目爲伊川之後代有替人

顧鳳彩字霞儀號羽皇康熙丙戌歲貢幼失怙母陸氏矢
栢舟操鳳彩體母志讀書無間寒暑年未冠補弟子員

旋食餼蜚聲庠序爲母請

旌建坊同邑許嗣隆中允爲葭葦戚數相過從閱其文輒以
大魁相期顧數奇屢困棘闈母歿後縱情山水琴碁詩
酒殆無虛日所居別墅號古藤書屋嘗集諸名流觴詠
其間當時若鄧孝威孫豹人諸公數以詩筒郵寄孝威
刊天下名家詩觀選鳳彩詩甚夥東臯詩存亦多採錄
著有蘇門集鄭志失載其孫崢始請增入

顧履厚字以寧號栢鄉十歲能屬文方舞象補弟子員旋
食餼學使賞其文目爲短小精悍以例貢成均已酉捷
北闈屢試春官未售謁選人得霍山教諭會疾作未赴
不二載而卒生平博學強記制藝外尤工詩賦試輒冠

郡屬書法秀逸得蘇米二家意善畫蘭踈葩偃仰泣露
搖風識者珍爲文士之筆中年溘逝士林悼之著有咬
蔗軒詩集

熊炳綸字瓚原警敏能文迥異恒蹊蘇州試皆第一受知
督學諸城劉公制軍高耳其名聘請書記摺奏亦經其
手分校鍾山書院課藝一本清真雅正士論允洽兼諳
河務與司馬觀察公商榷得宜應京兆試惜薦而未售
先是通州牧溫公賞其文後遷梧州守延至粵文章知
遇至渥極優後之楚襄陽守張菊溪篤念舊雨欵畱甚
殷因衰憊決計歸里噫以諸生而名動公卿生平際遇
之隆亦屬罕有而義概雄心終不免於屢空年八十脫

然而逝晚年得一子名寶觀

湯咸字阮仲號讓泉賦性深醇以孝友文章著弱冠入邑
庠爲文夭矯權奇絕去町畦鄉舉屢黜丁酉入成均應
京兆試邀薦於張侍御光憲又不遇維時負藻鑑盛名
如朱公葵元邵公晉涵王公章先後過高軒譽重京華
卒困數奇王嘗贈句云放眼肯交天下士閉門自見意
中山其推許如此白山才子瑞閣學芝軒稱金石交亦
惟盱衡扼腕而已歸益鐫劖自刻詩法少陵文學韓柳
書法顏徐晚更出入二王絹素盈几案見者擬之鐵門
限云年始滿卽鍵戶藝花蒔竹奉侍北堂歡暇輒集昆
弟朋友暨子姪輩觴咏終日遂絕意進取然性靈中有

女皇縣志 卷十七
經濟其規畫世務恒精幹饒智慮有惠澤及人邑公事
悉資協理凡荒賑義舉無不輸粟解囊令人人獲實濟
鄉城交推以爲不愧其父東阡風矩非徒經生家沾沾
章句已也年六十有三卒著有抱甕軒集燕臺小草
胡之本字因培太史夢白先生孫幼穎敏長從退耕姜太
史遊試輒冠軍受知於督學劉有聲膠序讀書古柏園
功苦靡間癸酉鄉薦不遇遂澹於進取奉母沈太夫人
克盡子職母壽逾大耋人謂孝養所致生平睦族以恩
御下以寬邑公事若學宮書院皆竭資襄理勇於爲善
類如此晚年閉戶著易蘊二卷課子弄孫年九十三無
疾逝洵藝林完人也

宦績

宋王惟熙字國和景祐元年登第調鹽城尉州有羣飲而
殺人者獄久不決州以屬尉熙脫其械勞以酒食遽呼
曰汝用左手而死者傷右尙何辭囚曰讐此人久矣幸
其醉扶之官得其情死不恨擢大理寺詳斷官持法堅
正奏案成卿使易之執弗易卿怒戒吏曰王詳斷不可
與共事促奏罷之吏爲恐熙徐曰事顧是否何如罷非
所恤奏亦不報爲審刑院詳議官泗州船兵坐盜米當
死熙議米來遠盜者非一日也如必責其贓於販之州
卽殺人多矣覆之免五人儂智高反掠嶺南諸州吏棄
城者數十人皆麗於法熙議州所守者城固而兵足用

也嶺南兵與城皆不足恃奈何以常法致之死上亦憫之皆獲免遷判大理寺累官司封員外郎嘉祐七年卒有集十五卷熙天性平恕雖爲法官務原人情時謂宜昌其後云

明劉鑑字明善洪武己卯舉於鄉永樂初登林環榜進士知平谷縣縣有猛虎爲害鑑禱於神虎旋徙去坐事謫居後以薦爲新鄭州學正多所造就諸生肖像祀之黃通理宣德間舉人材以戶部郎中出守饒州時府治頽圯前守皆憚於改作無敢肩其事者通理至卽愾然曰是吾責也吾佩二千石臨長一方而闕冗如此何以表率屬考卜得蕭恢使君遺宅庀建今治輦石陶埏民樂

趨事時皆推理幹略理又善撫循其民民尤戴焉列江西循良傳

李愔字樂夫素之孫也以貢得襄陽府經歷不携妻子惟圖書數卷自隨襄陽民俗頑悖逋賦健訟愔持以剛決有幹濟稱郡縣疑獄輒移愔之滿三載乞致仕歸愔治家儉每致贏餘值歲飢大散所積全活者頗衆平居惟藏書以訓子孫不問外事卒年八十有六

劉瑗字敬之成化間以貢知海豐縣民積歲以逋賦被繫瑗至悉釋去定以賦期人人感激樂輸竟無逋者善鞠讞他郡有疑獄御史臺必以屬瑗剖決多奇中滿九載當報政民相率詣藩臬乞留旋以丁父憂歸民號送踰

境猶不忍離爰性謹樸寡慾歸惟杜門以文書自娛時稱長者歿祀鄉賢

錢徹字大經以國子生授武昌丞端雅廉清嘗奉檄造紙輸部不以一毫自私亡何謝事歸篋中惟數石硯耳天性孝友輕財好施以先業讓諸昆弟日惟課花竹兼善繪事尤以畫魚擅名里人珍之孫藻成進士官至順天府尹人謂食舊德云

冒鵬字廷舉以選貢見知於楊文襄公一清授富陽令性伉率縣城南面瞰江而門一日監司行縣艤舟城下會大雨濘鵬直輿而前監司却立受謁鵬徐命隸舁門賓江之干加席焉而後行謁監司艤然怒曰今何爲爾鵬

聲曰不爾是以朝衣朝冠坐於塗炭遂拂衣歸居鄉正自持無敢有藍色者

字汝材隆慶中以國子生授招遠丞候銓京邸時同舍有貧而客死者傾橐以資其歸比之官惟一僮肩竹簾自從地產礦金歲有獻至卽卻常例不少染指居二載有廉聲而與墨令不相能遂致仕衣故衣策一欵段歸行李如其初也家食麥飯嘗不飽稍有斗儲輒以分婁人居恒無苟容人咸敬之稱爲廉正君子云

薛舜民天生港人隆慶中以例貢授浙之建德丞不樂其職曰使榜筮民肌膚而駿其膏脂以自潤吾不爲也令或委以訟牒不時報遣廳事如水哦松衙齋約略了公

事而已令知其廉靖不過煩之無何挂冠歸宦橐蕭然
適意江臯不復與塵事接以壽終

冒日乾字孺文天才敏妙弱冠補邑弟子員萬歷乙酉魁
南闈屢試禮闈不第丙辰謁選授湖廣安陸令地介子
午俗悍民貧乾至覈詭賦公簽報神聽斷擒巨憝崇文
學賑貧窮一邑頌神明焉考滿議調京山復以邊才推
丞永平贊畫軍機手司出納一切嚴屏絕無染指蜀土
司兵驕悍以法繩之一軍帖然平生性篤孝父病思食
鯉適旱涸無魚父歿乾終身不復食魚好讀書尤嗜左
氏傳著有篋餘集若干卷

冒夢齡字汝九號元同少有才名十試不第以選貢授會

昌縣令建學復田有惠政以憂去服除補豐都令值奢
寅變起與石柱女將秦良玉協力破賊城賴以全後遷
知寧州遂拂衣歸嘯詠林下垂二十年歿後會昌豐都
人間之皆巷哭臯之人過墓必式也所著有得全堂稿
行世子起宗別有傳

張勉學字汝循少有幹略萬歷初以明經授福清知縣長
於剔抉吏無宿姦南日山延袤八百里海中沃壤也介
興福間交閩而山田盡蕪闕不已學受署爲衝波航海
露處浹辰理其畝分疆定稅數十年不決之爭一朝立
解增餉至二千餘二郡民祠於山之陽是邑吻海派江
故號盤錯地卽才有力者不易勝而學游及有餘一時

咸推服卒以中忌歸邑人至今惜焉子美中爲臨清判甫任盡卻常例勵操自將遽卒於官人尤歎惋

盧守儉字子常萬歷間以太學生爲浮梁主簿厭薄吏事不三載乞歸歸則杜門不營一切他日浮梁張驥來守泰州先走一介存儉每行縣必造其廬訪焉懷舊德也年八十餘從弟洛字子書亦以太學爲濱州同知遷福建都司經歷攝古田令以廉恪稱罷歸老不釋卷日作制舉藝課其子以詩文自娛鄉邦推重郡貳守孫溫如人也比莅揚亦加禮遇焉時去濱越二十年而溫如謖人兩賢之年亦八十餘

振字伯英以太學生授南鴻臚司賓署丞滿三載

國子典簿清勤自矢出入鉤校不爽錙銖會大司成闕汪太常宗伊來署監事額外頗有所需振持故例不予汪銜之時值大計中以考功法振束書竟歸殊不以介意也以故縉紳間得伉直名

許汝忠字敬德少而豪宕稍長奉其父鳳訓乃折節讀書束修砥行萬歷初以太學生授隨州判再遷忠州同知在隨州四載而將漕部京者三攝孝感應山二縣篆者居半孝感有冤獄歷二十七年未決忠立雪之有賦額歲二鑑猾胥積年掊斂歲二十鑑忠廉得其狀論戍七人復舊額民甚德之忠州獒獠錯居土人黃某世州將也殊桀驁見忠端方儒雅甚嚴憚之忠州人藉以救寧

嘗署上石上思兩州篆尋以病自免歸家居不苟言笑
溽暑必衣冠而處族有寡者饑爲授粟切爲具措其少
俊者更爲置義田遞贍其學一奉父遺教多有成就時
稱其誼焉

錢守謙字益卿幼英敏每試輒冠軍食餼三十年萬歷丙
辰以歲薦對大廷司訓中都之定遠移太平當塗進遷
池州府教授三司教鐸育秀興賢循循有則一時三學
名賢蔚起功名通顯多出謙門迨休暇後日與諸昆季
飲酒賦詩課子孫教孝弟足跡不至公庭

錢守義字宜卿幼負雋才補邑弟子員屢試不遇負笈遊
成均謁選授蓬溪簿減贖緩息獄訟精勤自勵會詔三
殿工有採木之役多畏避義毅然受署入山箚排毒霧
三年再往躬竣大役閭閻無擾直指孔貞一深嘉其才
有巨猾張節者素賦橫鄉曲扞文網當路屢囑邑令收
之不得義爲方略摺致置之法一邑稱其能丁父憂歸
服闋不復出居家篤友于弟三卿貧甚義數割產與之
子五俱邑文學

胡應詔奇嶷敏達饒吏治才由例貢主湖廣廣濟簿邑素
多盜應詔廉其渠魁密請於上官立置上刑餘黨悉解
散爲良民秩滿陞南陽衛經歷拂衣歸里訓子弟以忠
厚爲先務圯闢廢橋輒傾資新之子邦清禮部儒士孝
友醇謹不言而躬行孫山龍名標上舍考授州同知

女學縣志 卷十一
曹鼎臣字公鉉父希曾爲名諸生困棘闈者四十年鼎臣
天姿高邁然力學攻苦丙子魁鄉榜丁丑捷南宮授閩
縣令政治有聲任滿當調閩人留之復任癸未調寶坻
撫按特疏薦召給事黃門鼎臣竟致政歸里溷跡市廛
歲癸丑暴疾卒子繡郡庠生孫期無嗣立秉恒以繼秉
恒生二子又生孫汝南汝霖等五人焉

國朝

丁其譽字蜚公順治乙未進士性孝友少喪母事父惟
謹家故貧以修脯供甘旨異母弟三人皆完婚娶釋褐
後授石樓令石樓爲山右巖邑民多輕生其譽引古義
相勸諭俗漸還淳無自經溝瀆者有老人暮夜饋金五
十其譽毅然正色曰余矢清白素矣彼敢以不義相污

耶遂寘之法分校文武兩闈得士最盛兼精岐黃術樓
民病貧不能藥其譽施藥濟之沉疴復起者甚衆任滿
擢行人司三奉使星歷萬里必取道還定省以父允中
年九十孺慕之誠益篤遂請解組歸澹泊自甘足跡不
入公府所著有壽世秘典者英錄諸書年六十三卒
劉愈炤字文若性孝友爲宗黨所推重兼擅文譽屢試冠
軍兩中副榜以恩拔授廬陵令廬民凋敝已甚愈炤一
意撫循招流亡清丈量息獄訟免贖緩修文廟課諸生
以故文風丕變凡所甄拔士皆登上第期年課最應不
次擢雅懷高尚卽解組歸單衫匹馬行李蕭然居鄉十
載立行百善圖以白勉子增瑄增璜皆爲聞人

石朝賓恬靜寡營僻處村落日課書督耕爲樂人以無禮
相加不爲動由太學生官山左寧海州同委攝州篆二
載廉明仁恕好吏豪強無不斂手州地大不治賓設法
招徠墾田七百餘頃歲饑捐賑全活五千餘戶設義學
教州子弟之貧者一時絃誦比鄒魯但寧海土瘠民貧
催科最難賓不忍加鞭扑以勞疾卒於官寧海遂失賢

牧云

高巖字山公至性深淳母朱病服藥罔效巖願以身代夜
夢神人以金丹授母疾立愈事載維揚華王廟碑康熙
乙卯耿逆蠢動浙閩總制姚公徵聘幕下巖時方諸生
叅贊軍機連破十五寨功加十九等賜正一品服克永

安縣卽委署縣事縣當殘破之餘撫輯瘡痍民安堵如
故旋丁父憂服闋補授孟津縣知縣德政惠澤悉載河
陽紀略士民愛戴建生祠於東門外撫軍閻公以治行
第一薦甲戌內陞工部虞衡司主事乙亥轉工部都水
司員外丙子轉戶部江西清吏司正郎督理南新倉事
務爲江西存留米穀飢民賴以活者數萬人

張祚字良蔭號松友質性醇茂風期端整少孤而貧事孀
母吳恪稟義方績學攻苦母憐之令少息乃匿油匱中
俟母就寢默燃誦暑夜則納足於囊以避蚊蚋康熙己
酉舉於鄉母逝每夜分掩卷必泣然泣成進士宰朝城
不矜於色而自無馭法東民故淳樸苦貧瘠常出郭召

三老問其疾苦歲大稜斥俸爲糜粥哺之凡修學徵課
釐剔諸弊咸當士民隱頌爲張善人立碑以誌之癸酉
充文武兩闈同考官所獲皆名雋已卯以後訟庭闐寂
囹圄一空以循聲膺

召授吏部主事卒於京

石爲崧字五中號樊山弱冠舉於鄉越六年成進士三任
縣令歷官戶部郎初令靈邱時哈爾旦犯順羽檄旁午
以書生馳驅戎馬間動合機宜老於行間者皆嘆爲莫
及也繼任樂平民有爭山墳者自宋迄今不決爲作文
祭告山神立起墳山無左驗以六百年被占之地歸之
原主遠近傳以爲神又縣有雞脚村環村懸巖險絕明

末馬氏避兵其中聚族而居若苗人負固歲徵課六百
金抗不納歷來苦之崧單騎往諭卽懾伏樂輸焉先是
撫軍年羹堯勢張甚值歲大旱爲崧方祈雨於稷壇年
差官嚴檄迫征民課崧就壇燭焚其檄吏民悉股栗崧
恬如也持檄者訴於年年亦不以爲意曰若老名士屈
居下僚固宜有此故態後撫軍張公廉得其異政善之
報最第一內擢戶部主事遷員外郎

聖祖仁皇帝召見

欽賜蟒服及周易折中未幾告歸爲崧天資聰慧喜讀書鴻文鉅
筆爲當代巨公所推許德州孫子未見其文輒拜焉室
遊三十載眺覽山川憑弔古蹟悉寓於詩家居孝友異

厲後輩以斯文爲己任臯人至今稱述之子恒鍾瑞同
恒鍾瑞別有傳

范大成字慎時號若菴少遊庠食餼試輒高等由廩貢讀
書上舍

廷試稱

旨例授內閣中書不就逾六載除汀州府司馬迎父養於署甘旨
滌髓必躬親之潔已奉公一遵庭訓或有以規例進者
笑却之嘗按部至清流域適火起焚六十餘家卽斥俸
賑恤之擢江西瑞州府太守其清操如在汀時下車修
文廟建節愍祠設義學立義倉悉斥俸入不取給於民
務息事寧人端已式物不假赫赫之聲施以示威嚴相

國朱文安公嘗稱於人曰范太守盎然如春日之和飄
然如秋雲之遠如禾黍之潤被恩膏如子孫之念其祖
考固非可勢驅而力使亦非可智取而術邀蓋寔錄也
以終養告歸謝絕人事家政付弟大經友愛諸季錦衣
承歡逮事八十八歲老父嬉戲膝下若孩提然子樸世
其家學爲茂才餼於庠

張懋昭字自明號愚谷少孤母趙有女行一秉其教遊雍
庠入貲授廣西永安州牧永猛獠雜處召土司定約束
撫以信義蠻峒遂寧爲治寬簡去其不便民者與休息
永人德之大學士陳元龍巡撫粵西以懋昭清廉改養
利牧考治行第一懋昭初饒世業每急人之急曾解干

金贖故人子歸其喪比刺永旣矢清操又建文廟立義
學兩歸州倅旅櫬費斧益不繼北上引

見品費皆出稱貸奉

旨回新任尋卒年四十有五訃至永人巷哭插竹而望祭焉走是
城守千總某醉酒相犯協鎮將奪其秩昭不怒更曲爲
保全及昭歿某撫地哭血出指爪間昭心存利濟學足
以芥千駟而才不止方州惜天不假年未展厥用甲中
至今言人以仕富昭以仕貧行誼志節不愧古人云子
學翰學舉學守

鄧士英字謙谷少僮有幹略好讀書蒐羅佳刻書畫古
玩以供清賞起家藍田令署臨潼澤浹旁郡嘗建義學

以育人材立鳴藍以課髦士均里甲以輕徭役革包收
以利生民出粟賑荒平允獄訟至今稱善政云子繁祐
候銓教諭善吟咏守清白之訓村居不與塵事泊如也
范大士字兩奇號拙存以明經授天長縣教諭陞直隸肥
鄉縣知縣補任馬平前後政績茂著詳載鱣堂文集及
肥邑政略中擢戶部山西司員外陞任兵部職方司郎
中

欽點己丑科武闈正提調公明廉正聲冠兩曹

特授廣西梧州府知府梧州地總百粵山連五嶺士到州多方綏
戢輕其科而勿苛重其禁而勿弛部內肅然時人方之
陳稚升著詩發二十卷尤侗謂其取精富而備物博云

高濂字漕漪太學生於康熙丁丑年隨白將軍西征効力行間論功授北直內黃知縣值歲饑請賑不報竟發倉粟哺之又單騎至鄰邑滑縣借粟三千石以補不足民得以生黃臨運河苦糧艘運丁之害濂獨發其私請汰運司

欽命漕撫

諸大臣鞫之黃民數萬人爲清白寃濂得直丁父憂歸起衡陽知縣途次內黃內黃民歡欣鼓舞迎於途而歌之曰公今遠去湖衡陽衡之民慶我心戕公德巍巍不可量衡山高兮湖水長治衡報最第一三護衡州太守印又護衡永彬道印清遇事慷慨前後受代多爲去官者補其帑以故家中落歿後衡民爲之立祠祀焉

鄭昴字龜斯幼讀書授輒成誦無所遺忘年十八補邑弟子員躋於塲屋以明經補光祿署正慨然曰是豈不足爲政耶凡祭享犧牲及官府餼餼之費前爲做吏侵漁者皆釐剔帑不虧而事立辦庚寅晉大理寺右正分勘楚閩楚俗剽悍閩通海洋故犯多重辟昴叅佐多所平反壬辰補戶部廣西司員外癸巳

覃恩贈

王父母夏轉本部福建司郎中兼攝直隸其會計出納倍於他司昴以幹才典領其職識者謂崔從之風望李絳之簡廉無以過也時大司農張遂寧知最深每綜核掌故審擇機宜無不恰當遂寧嘗曰科目中鮮此人四居京職所在有賢聲而囊橐蕭然昴賦性坦夷行事接物

如皎日和風好賓客觥籌交勸酒酣耳熱縱論古今終
無倦容至於周人之急常有以居室饗殮終其身而口
不言恩者嘗語諸子曰讀書要識聖賢旨歸端品行工
文章須兼有之子大德辛丑科進士初令山陰再令鄞
縣

鄭勛字樗常祖文成父琪勛好學持身嚴正以明經宰高
安日巡行阡陌間勸農課桑邑以殷富捐俸創義學歲
有考月有課士習丕變旋以迂顯要去官高安百姓如
失父母咸涕泣裹糧欲為申理巡方便者廉得其寔聞
於

朝

特降中旨者三載在續例入對時

天語褒嘉

特授刑曹用獎循吏勛在曹司訊鞠多所平反自大司寇以下咸
視若左右手旋被

命以工禮二部員外郎補用勛引止足之分乞假歸里子四大字
大任大敬六位

鄭大毅字潛夫生而朗雋風神疎徹踰冠游庠名貫江左
里中英哲延入文社如林宗之首八俊田巴之屈千人
也以貢入賞得牧巴州以父老乞改近省擢濟南同知
東省昔多伏莽甫下車設略弭捕萑苻頓消歷下七十
二泉分爲二河曰大清曰小清復漚於海經久淤塞水

溢爲患毅櫛風沐雨而疏鑿之水利以興民漑其澤至於兼饒政則商困甦而國課裕運軍餉則事無廢而時不需中丞臺將以名入薦贖毅堅以疾乞歸栖遲蒲上意泊如也生平寡言笑敦孝友幼奉母宗諱哀以歲加禮無老廢晚遭父憂溢米時進雞骨支牀門故虞其毀性君不之更也

陸景龍字文圃幼英敏弱冠以明經授漢州牧理煩治劇案無留牘而寬厚愛民民親之若父母考滿復留治漢州凡十八年以母老告終養歸里韋布蕭然不似仕宦人晚葺六鶴齋與昆季輩飲酒賦詩足跡不履公庭云沙漢鰲字亦夔號東海康熙間嘗訓導徐州丙午簡仙居

一 督臣李衛以山陰重煩三年九易官調游山陰承追九十三案上言求豁不允適奉清查鰲條列力爭始免承追修戢山書院周大樞周應宿姚述祖陳道煥方天游諸名宿皆鰲所造士也公係集官箴錄一卷修禹穴蘭渚諸勝蹟壬子擢行人司行人改授杭州府同知監兌漕却兌規監督運又却運規民感激爲立碑紀恩擢長蘆運同改銓彰德知府引疾歸布衣藿食日午不炊歸五年卒於其祖之內舍嗚呼鰲以訓導擢郡丞擢大尹固足徵經術抱負而介介之操終不以寵矜不以貧易可謂廉矣

丁曾字孝方性謹厚善事二親由太學上舍任郡倅始仕

粵東韶州聞父訃即日返哀麻哭泣哀感路人毀瘠讀禮三年恐傷慈母意每定省必怡色退則潛然涕隕也服闋奉母命補官任瑞州多惠政俄丁母憂爲二親營葬事廢產數千金庀材礮石親督率匠師俾坊表峩峩松楸鬱茂凡冥藏之儲享祀之舍豆籩椀爨之器纖悉俱備再補河南彰德政簡民淳日以孝行勸勉部民於是七邑多化於孝者捐俸建鄴城書院延名師給膏火諸生掇巍科者五人韓省儉邱日增許吉楮柴志王聖一皆曾陶成之力也又司漕轉運除去運丁規例百餘石建議開墾蟻尖山可得腴田八千餘弓其宏猷碩畫著兩河內外治彰十年以春秋祭享時缺遂致仕歸禮

益恭心益降於姻族鄰黨及貧窮孤寡率以德意相親厚乃命子長睿曰爾祖嘗勗余以榮祿逮先人爾其承乃父之志遣之官山右而曾以家食終老

范理字燮臣中書舍人大本子丰儀朗秀每吟諷翔步望如瓊樹雖簪纓世胄泊如也雍正六年任用材賢得不次擢理遂以諸生應刑部山東司員外朱濡薦送吏部學習八年補本部司務和協裨贊時被寵遇得協辦文選司再署驗封司乾隆三年以勞卒於官兵部給繻歸吳翀字羽中號迥樓才思英捷日構文十餘藝出應鄉郡試必冠軍未冠游庠與同里高才結起社會文海內嘖嘖稱之而比翀於雲間之大樽臨川之大士雍正癸卯

拔貢

廷試授山左大使轉運使者藉翀如左右手曰若不以協恭來而以屬吏來耶上其名於中丞臺俾署膠萊分司篆遷玉田令丁母憂居廬讀禮鄉里式焉服闋補固安縣調武清前後三爲令教士愛民若塾師之於弟子慈父母之於家人涖武清尤多善政罷秋汛防隄之役開子牙河清私沒地斥穀賑飢存活千餘家前後八載悉以爲常隣邑有疑獄上游悉屬翀鞠爲畿輔治行第一以疾力請歸去之日校士村氓焚香號泣數十里不絕未幾卒於家生平重然諾輕推解內行甚篤一門四世同居怡然秩然也子四繼元辛酉舉人富陽知縣容廩貢生

卽用訓導又純考授州同知合綸邑庠生

石恒號久也爲崧子少爲諸生有文名屢薦不第遂入貲爲令歷任安岳蒼溪長壽等縣循聲丕著後任孟津以公誤解組大吏愛其廉且才薦之起柘城令終於官

張朝縉字毓屏號松園性慷慨才識過人援例授福建沙縣令調閩縣歷有政蹟陞廈門同知緝匪巡私嘗於營弁中識蔡攀龍有大將風脫其寃獄後果以軍功總鎮狼山莫不服其高見旋以卓薦爲河南南陽守值歲飢民聚衆攫食鎮府欲兵之朝縉單騎勸諭衆皆散無復肆掠居民帖然調開封府適陝撫畢來豫籌辦旱災朝縉求奏請截漕二十萬石全活饑民無算並求奏請蠲

免全省漕糧以紓民困陞廣東按察使於庶獄多所平反未幾授浙江布政使丁母憂歸是年湖南苗匪弗靖元戎福督粵時素重朝縉卽奏調往軍營効用叅贊機務旋有甘肅藩司之

命道經襄陽復同總鎮徐德昭撲滅教匪餘燼抵甘省辦理災賑動合機宜歷荷

聖眷優渥

賞戴花翎

賜上方珍物

御製石刻石鼓文蝶仙詩恭藏於家因公望誤疾終里第

顧駟字牧園號木原辛巳進士授廣西平南縣以憂歸補

湖北麻城令陞漢口鎮司馬歷署鄖陽安陸太守善聽斷遇疑獄立判決數年積案一空操守廉潔門絕苞苴暇則集名流分韻賦詩語多奇警工書法得其墨跡者皆寶藏之教人爲文根柢經史子金城巡檢金垣訓導徐觀光字賓占號鳳軒由兵馬司指揮歷官刑部山東清吏司員外郎嚴毅有節操人不敢干以私亦不以私干人大中丞閔鶚元舊同西曹相契厚及閔撫吳終不因夙好有所請託邑學宮向無歲修費捐贖田若干畝歲息六十餘金爲永遠修葺學宮計督學謝墉爲文勒碑記其事卒年五十有六嗣子珠候選從九

右觀字仰也號文軒性警敏入庠食餼貢成均授懷寧訓

如皋縣志 卷十七 五
導恭逢

聖駕南巡蒙

恩賜綵緞荷包大吏保薦縣令捐州牧得高唐丁母憂服闋補雲南阿迷民俗多棄子爲創育嬰堂全活無算營水利墾山田斷疑獄建書院有古循良風以運銅差竣調師宗旋攝廣西府篆多治績卒於官署

張朝樂字子長號竹軒官廣信府知府以母憂公私交集卒於官署初任湖南龍山武陵湘潭諸縣湘潭有左道惑衆者擒其魁治之邪教頓息署武岡州旱虔禱於神甘霖沛降士民感德有喜雨詩四章以卓薦授袁州府調廣信府鋤強橫伸冤抑他郡有疑獄不決者民願得

麻面張公一鞠至死無恨其明斷爲人所傾服如此

吳尙友字賓祁號是軒生而夙慧穎悟絕倫入庠食餼年弱冠膺督學少司寇錢陳羣特薦奉

旨以知縣用

分發粵東署連山廣寧茂名歸善等縣連山與猺人

接壤先是猺人殺人已遁還入山有良民被仇人誣指爲兇渠其人已誣服友初至訪得其情捕獲殺人者抵死出誣服者于獄茂名負山阻海密箐深林易藏奸宄有一家五命被殺搜捕罪人歲餘不得甫下車廉知鄧氏兄弟三人素兇惡被殺者乃其宿怨陽縱獄囚與通以計獲之置之法調南海令積盜董三董四王禿子等先於鄰邑殺人劫財潛入境內遣役密捕無漏網者陞

直隸羅定州知州於庶獄亦多所平反可謂明慎用刑者矣

范全仁字性源任浙江鹽運副使陞甘肅寧夏府水利同知地資山水灌溉豪強恃勢蓄洩不時致貧民失業履勘情形分別支派次第疏濬俾均享其利不至偏枯人歌慈母丁艱歸家居數十載多善行焉

范元琳字東亭號琢齋初試山西朔州吏目歷任湖南湘陰平江善化長沙諸縣令撫民養士著循聲尤明決能斷大獄湖撫陳宏謨嘆其非百里才陞直隸澧州牧澧多猾吏下車後悉逮治之境內肅然建蘭江石橋修學棚捐俸二千餘緡年老歸里更多義行云

盧又紳字修白號飛泉工書法名聞海內中辛卯順天舉人初授河南盧氏縣後歷任柘城武陟縣令振文教理積訟興水利禁胥役擾民治績卓卓遷刑部主政轉順天府治中皆稱職為嘉興府丞竭蹶辦公憂勞成疾告歸卒於家年七十

黃大鶴字舜年號南村衍長子亦愛子也衍兄循早卒以鶴為嗣鶴為人倜儻多才好翰墨工詩初授大同府判時勦回匪軍需旁午措辦裕如上官嘉其能委署欽州獲劇盜境內肅然攝揭陽縣篆築堤捍海免衝激民賴以安後歷任武定蒙化興利除弊多治績推陞廣東廉州府同知以運銅入都卒於舟次人共惜之

黃世巖字邦瞻號岱峯浙江温州府同知有兄弟構訟者以骨肉恩情反覆訓諭皆愧恥涕泣感謝而退承辦海塘易土爲石督工勤勞甚完固

純皇帝南巡大吏檄濬西湖祇候

龍舟尅期告竣

駕臨之時蒙

恩賜綵緞貂尾異數也旋因足疾告歸卒於家

鄭大位字御四號芳崖由貢生考授州司馬選雲南麗江府鹽井大使至之日剔獎寶裁陋規修老姆天宇井獲新涵詳請增額捐俸立廨宇創下井義學給脩脯列規條會丁父憂去服闋以通運判銜補大使原缺疏井涵

裕鹽勸督煎有法收課無私復於上温井築館延師置膏火田畝夷童漸知嚮學彬彬有儒雅風滇南地隔萬里母氏未得迎養嘗繪雪山望雲圖以寄意有詩人陟岷之思旋遭母憂服除後以通運判原銜補山西布政司庫大使亦多著懋績年五十三卒於官

顧三秀字芝田號蕉吟早歲遊庠食餼工楷隸善詩爲文超拔中順天壬午副車以縣丞辦河工宣洩堵禦有方授永清縣令訪民間疾苦釐剔夙弊調宛平有治聲任子牙河通判患風痺卒具幹濟才未竟其用人共惜焉沈全遇字開文號梅村由太學生援例授州牧初任四川蓬州值秋水汎溢傷禾稼壞牆垣相地勢高下開渠引

水民賴以安調廣安州州有水號三十六灘舊資灌溉
後淤塞設法疏通民復享其利其在巴州也有一二巨
猾貽害善良按法論罪境內肅然以疾歸年五十七卒
於家

顧人驥字仲隗號茨山甲子順天舉人戊辰科進士選福
建上杭縣令甫下車創香巖書院延名宿主講席遴才
雋諸生肄業其間文風大振社倉穀向無實貯收放盈
縮祇憑空文結報爲構數十楹於署旁以時稽攷社長
副影射無從民享其利遇疑獄剖斷如神案無留牘解
組歸建祠修譜收族敬宗務其大者遠者生平才識超
卓爲文追躡先正工詩晚年詩律益細六十有四歲卒

著有茨山文稿息僑排律暨西園詩集行世子金門歲
貢生金聲歷署吳川從化電白縣知縣候補府經歷金
閩庠生金殿國學生

范全睿字嘉會官雲南賓川州民犷悍前任多用柶杖嚴
刑以懲睿下車時易以竹法不峻而民服良吏也

仲元鼇字吟軒補博士弟子員入成均捐員外郎改捐知
縣選福建長泰縣令調署侯官縣前令張潤將事主楊
伯科作盜嚴刑誣服元鼇察其寃審係盜犯陳恒福劫
奪陳諭貨船將前次劫奪福清縣民楊伯科船隻換與
陳諭前令張遂疑楊伯科爲本案正盜輒用刑求以致
畏刑誣服大吏具奏

上以仲元釐虛心審鞫究出正兇冤民得昭雪甚屬可嘉着送部

引

見奉

旨以同知用事在乾隆四十三年未幾因公落職歸里後孳孳為

善有父之珍風

沈為棟字桂堂號培蘭官至陝西西安府別駕當教匪入秦多方堵禦大吏稱其能先是由庫大使歷任縣令長武地當孔道築城垣捍外衛內郡值大旱虔禱於神甘霖沛降生平慷慨樂施家雖豐饒漸致空匱沒後其覺蕭索邑人憐之

石鉉字鼎五磊落有才略勤苦力學精研四子書得真詮

博稽經史弱冠入泮有文名六躋棘闈戊午薦而未售援例隸選部簡發四川以知縣用委署宜賓善聽斷數年積案一空上官嘉其才題授順慶府西充縣令斷疑獄理沉寃收偽官優人張廷棟人以爲神捐俸葺祠宇修衢路多善政兼署南充縣事護順慶府川北道二篆攝東觀鹽場大使事政務紛沓肆應裕如大憲正擬保舉擢用而適以丁母憂歸遂絕意仕進林泉終老生平不樂戲嬉惟據几披吟朝夕弗輟論及古人事跡得失善敗若懸河决溜洞徹源委其治績卓卓蓋皆從學問中來也卒年七十有一

沙漠纓字清斯援例選福建平和令時獄有繫盜十七人

纓察其寃請大吏欲平反之不許乃懷篆求劾謂上官曰寧鐫職去不忍使良民負寃也越旬餘果獲真盜寃民盡釋後任上杭調南靖擢福州司馬降調廣東惠州府經歷以卓薦授湖南沅江縣蒞任數載多惠政晚年乞休杜門謝客七十有四歲無疾而終

鄭景莊字啟南號讓齋年十一母石卒盡哀盡禮事繼母鄒以孝稱隨父隴州任習吏治初任浙江運判署溫州攝樂清縣令弭盜決獄有治聲爲民雪寃民負旗書青天父母四大字歡呼市衢署慈谿寧波衛軍數十人借鹽禁詐索不遂輒誣械悉捕衛軍懲以法補嘉松分司護鹽運司篆離政詳明裕課便商恭逢

聖駕南巡蒙

恩賜克食貂皮蟒緞方期大用忽里吏議歸奉親色養備至親沒

哀毀死於孝年五十有二

陳天章字倬雲號霽亭由附貢生援例授雲南姚安府白鹽井大使力除宿弊以卓異任四川安岳令縣有蠹役廉知之嚴加懲創人皆側足立不敢藐法署敘州府馬邊通判重慶府江北鎮同知所至皆有治績前後居官加意文學培養士氣以疾乞休卒

石中寶字汝執號韞齋幼攻舉子業艱於遇援例得陝西布政司經歷借補理問歷署洵陽白河令龍駒寨同知利興獎革有治聲民因墾田起爭端詳爲經畫皆息訟

安業以親老請養歸里葺學宮修縣志救飢荒捐貲襄
事踴躍爭先族譜宗祠尤獨任無吝色年六十有六卒
吳廷獻字觀雯號修亭為諸生時讀書負經濟才及官全
椒訓導委辦賑務井井有條全活甚眾授江寧教諭未
幾以疾卒人以長才未展共惜之

顧之瑞字桐陽少英異識力過人饒幹略以太學生援例
授州同補山東濼口批驗大使斟酌利病商竈兩便清
廉自矢有干以利者輒正色拒之後因積勞成疾卒人
謂未竟其用咸嘆惜焉子鳴鸞官宿松縣令

錢五知字心田號又布選泗州吏目任盱眙縣尉借補鹽
大使調無為州吏目署無為州江防同知時江壩衝決

奉委修築督工勤勞事竣大吏稱其能曰堅固可保久
遠置義田於孔山葬埋溺死骸骨以千餘計感恩頌德
歡聲騰遠近丁母憂歸里卒年六十八生平好義城垣
學宮祠廟皆捐貲修理遇年飢出粟助賑慷慨無吝色
子善勗江西布政司庫大使善昱監生

吳若湖字好亭號西園官陝西隴州同知修學宮開濬蓮
池達泮水聚山川秀氣人文蔚起與州牧吳炳捐俸修
義學事未竣以母老請養歸里旋丁母憂卒

金舜臣以吏目分發河南初署陝州吏目旋署陳州商水
縣尉時歲饑在邑內周家口承辦賑務帑項外自出貲
二千餘金全活饑民無算紳士李琪率邑人勒石頌德

後補南陽唐縣尉因積勞沒於官署

徐大椿字崑華以府經分發四川由軍功任資陽縣令旋

擢漢州牧

賞戴花翎籌辦糧餉積勞成疾

恩詔優卹

叢之鐘字韶泰舉人任湖南桂東縣令慈惠愛民無愧循

吏調長沙縣等以疾卒

黃大鵬字御乾號竹山才具明敏初授貴州貴定縣令歷

任滇南粵西州縣若昆明臨桂宣化左州橫州培士風

辦軍務賑饑荒擒劇盜治績卓然終落職以歸年七十

卒子芬候選州同

吳積忠字丹懷號蔭亭車馬湖人甫弱冠為鳳翔縣尉時

山左劉文正公總制陝甘見而器重為擢武功藍田令

武功有劇盜張狗兒稽誅有年積忠位任三日即緝獲

之又有兄弟相訟者引至中庭開陳勸諭遂感涕泣

以去由是聲達上游值用兵西虜檄辦馬政積忠往來

於西安隴州轉輸無悞軍功加一級又隨帶加一級援

例捐陞五城兵馬司正指揮遷湖北德安府同知不數

月引疾歸里生平強幹廉明秉性沉毅不輕然諾有善

舉必力行不怠學宮之崇聖祠為其先人所創建歲久

傾圮急捐修之父有義糧贍族與兒積仁續承勿替兄

歿一人經理尤為周至卒年八十有一猶留時猶呼其

子若姪諄燭至再焉

沙熙純字觀光少而穎異喜讀書成童節工制藝以攻苦
溝羸疾遂棄帖括遊京師謁選得直隸冀州南宮縣縣
丞制軍方公觀承一見卽器重之時

駕幸五臺道出保定蓮花池委純治

行宮陳設清雅

賜綵緞荷包制軍益重其能凡

駕南巡及

幸木蘭等差無不委任焉屢署劇邑有能聲其最著者賑荒清河
規畫盡善俾窮鄉僻壤老弱顛連均沾寔惠時有父母
生我庭之頌方唯保薦以疾作不起制軍恒悼惜之卒

年三十二娶石氏無子嗣兄子培裔繼其後

顧三餘字綺波號魚山性孝友自幼勤學能文冬擁絮夏
納足甕中漏三下不輟年十七補博士弟子員科歲試
輒冠軍乾隆癸酉選拔肄業成均文出諸先達莫不激
賞應南北闈屢薦不售考職州判以丁艱歸里遠近爭
延課子弟生徒百餘食餼中式者甚夥而餘卒不過家
貧守介三韓褚公以素交來刺崇川下車造訪不干以
私年六十部銓河南信陽州判分防平昌例管詞訟餘
閱詞涉虛浮者卽時批飭不以累民向有規例悉裁除
之平昌文風卑弱親爲教授其貧乏者捐俸助之多所
成就喜臨池字法逼虞褚求書者戶外屢滿丙午科聘

女學集志 卷十七
充內收掌主試德公素廉其名相見折節待以師禮蓋
曾爲其同年侍御五公業師也歷署羅山上蔡縣令弊
絕風清口碑載道欲以老辭官百姓號泣攀留居官十
五年敝衣蔬食一如寒素嘗曰吾雖貧以清白貽子孫
足矣年近八旬始解組旋卒于豫著有蕢山詩草香雪
堂文集子四季畹先邑增生

章翀字凌霄少失怙事母孝由內閣供事官議敘得湖北
安陸縣尉安陸爲德安首邑值教匪滋事外嚴城郭內
防岸獄頗形艱鉅嘉慶五年春教匪圍德安郡縣同困
者六日翀不以官職卑微力謀助守大僚賴焉命運艱
解稍十數次俱無誤迎母署中盡養母死哀毀隨逝居

官十八年貧無以殮士民劇金殮之安令丁德盛遣人
護柩歸里老幼涕泣奠送有徒步至百里外者

宋元鶴字馭霄籍于蘇文恪相國嫡系祖梅亭公僑居臯
遂占臯籍讀書明大義慎交遊重然諾里黨推之授福
建甌寧縣尉循分供職有廉聲建寧暨兩縣缺鹽半月
民有食淡之苦聚衆蜂擁府縣署其勢沟沟總鎮郝欲
從事軍令鶴聞出勸諭詣總轅力解星馳飛檄催接運
鹽民情以定丁內艱回籍邑有公事如修學濟河辦賑
復竭力妥爲襄理卒年六十四子履彤

武勳

明紀信邑西廂人明太祖吳元年從軍至洪武時攻城克敵歷著武功授遵化衛指揮使年六十卒於家葬城西南隅子勝襲父職

石聯雲一名砥字次平賦性磊落好結納連試文場不利意鬱鬱偶游東海上觀軍大閱防秋慨然曰此非傑士之所爲乎遂投筆而起舉萬歷乙卯武科授千戶參維揚海防軍時遼陽失守御史游公墓兵援遼未及行罷歸兵使馬追責前餉一軍皆譁馬大窘雲挺劍突圍掖馬出大聲諭衆利害復許勞牛酒給歸裝衆感悅斂兵待命自是馬知雲之有將畧也於是發營兵百餘又調

鄉勇數百人命都司張英與雲俱擊斬大盜李鯨楊子龍等十數人江海自此無賊患兵使上其事遷守備命甫下雲以親疾歸未數月兩親繼喪雲哭泣過當染疾日篤未及終喪而卒子生潤明經生澤邑庠生

婁可教字岐山饒膂力多知謀成童時即欲學萬人敵萬歷中從總兵王鶴鳴應援朝鮮播州等處屢樹戰功隨征勦思明府叛賊生擒賊首鄭可世襲泰州所百夫長順天撫軍素知其胸富甲兵取授募練中軍守備陞采石把總功加都司僉書適通州右營都司缺員闔營官兵請補是職二載五膺薦剡陞德州游擊壁壘振肅維時經略高大司馬王與中丞御史臺莫不倚為長城交

章表其績陞五軍七營叅將隨以應援功晉階副總大同新平兵時各口皆有貢馬馬價常浮數十倍悉飽邊將腹可教扣留三千餘金仍歸內帑不取一錢後以原職調補大同左衛加秩後軍都督僉事濬濠利兵解推恤軍士人思自奮越二年又調京畿神樞六營未及任即簡授大同挂印總兵官任事三月以年老致仕歸囊無長物惟圖書數卷而已子世新登庚子科武榜

國朝

劉烱字文清幼沉毅擅文武才十餘歲即補博士弟子員順治戊子詔生員習騎射舉於鄉己丑會元殿試二甲第一年尚未冠也歷官本省掌印都使司都使多著功績年三十六以母老乞終養與同里范是式范端胡

邦棟朱鳳台聯同善會優游林下五十年日與賓客雅歌投壺酒酣抵掌談笑神彩飛動雙虹老人嘗歎曰與文清晤對如坐枕椰林看史君子花心神俱遠

曹應鵠字翀霄幼時有神力日與羣兒投石超距年十五從戎康熙甲寅吳三桂逆命應鵠集義旅保惠州丁巳王師入閩擢叅將九月擊海魃於青嶼戊午勦廣西受鎮南大將軍蟒吉兔撫蠻將軍傅宏烈調鵠密啟大將軍言撫蠻幕中多姚江賈人恐難克敵願已分隸大將軍翌日傅將軍率麾下趨平樂兵果敗三桂憚鵠威名遣道士林日輝陰懷偽官印綬說鵠鵠收斬之己未偽粵馬雄攻梧州僉議退守肇慶鵠曰北山梧之保障亟守之掘

王師入

濠列柵賊攻數日不克鵠命千總李進洪益領步兵迎敵親率鐵騎抄賊後斬偽將一人雄敗遁大將軍詣營壘舉酒慶勞曰將軍雄勇尉遲敬德再見也已未次南寧賊帥吳世琮整軍拒敵鵠伏騎於山後戰既酣伏起縱橫馳突世琮中重傷自殺遂復南寧秋馬成蔭叛列象陣於賓州鵠擊破其陣獲成蔭辛酉攻石門生擒偽將軍詹仰王有功殺賊萬餘級獲象四

王師直

薄雲南二月賊萬餘人歸順鵠乘高望曰衆整而不亂詐降也急陳兵備之俄賊帥胡國柄率傾國之師至鵠身先赴陣斬國柄入白中路貝子王請乘夜攻之大將軍賴塔曰賊釜中魚片刻活耳幸爲我探碧雜關時日

未入鵠領騎至關睥睨寂無人即與騎約曰急報大將軍城可奪也比曉軍不至遂馳歸十一月破雲南城班師以軍功加左都督山東登州鎮總兵兼提督銜世襲拖沙喇哈番

賜鹿尾乳酥以寵異之前後平定兩廣雲貴方略詳一統志癸酉

秋被誣落職東省將佐咸為鵠訟寃

上曰應鵠効力行間久放歸田里予襲拖沙喇哈番如故壽七十

一終於鄉子七人

冒渾字樸人巢民孫生而兀岸不羣大司馬金世榮一見奇之攜入閩授武威將軍康熙二十一年靖海侯施琅奉

命征臺檄渾為前鋒親昌矢石先登陷陣遂克澎湖破廈門澄清

海甸師旋以功晉左都督官四川建昌游擊時烏斯藏苗民陸梁渾率輕騎走間道與提督唐公軍會於磨西渾設奇破擒之敘功陞成都城守叅將封榮祿大夫贈祖父如其官先是渾治建昌昌邑僻處蠻疆人不知學捐俸創書院延名師以教之不數年而應制舉者踵起昌人病不知醫惟事禱賽渾為購藥延醫民賴以生者無算渾去昌人焚香載酒泣送於道者數十里不絕
蔣煦字子和號介岑孺子子也雅善詩文工騎射性孝友已未成武進士因親老不仕築鉏月園奉板輿焉王阮亭嘗遊此謂林亭窈窕在邱壑間云姪明經賓門嗜學

侍庭階煦與談古司馬坐作進退之法孫吳奇正攻守之方令鈔輯成編當時營伍中往往用之有勲

蔣世琦字樹玉姿貌甚偉喜讀兵書癸未成武進士膺侍衛選出入屬車豹尾間以母老力請歸年七十餘端坐逝

陳嘉謨字昌國乾隆丙午科武舉人丁未成進士

恩賜藍翎侍衛

乾清門行走差滿授湖北襄陽鎮標南漳營守備因公罣誤時教匪滋事呈請投効軍營打仗二十餘次生擒賊匪軍功疊著嘉慶四年八月十八日隨同陝撫永在洋縣地方打仗陣亡其子京南遵例呈請附祀昭忠祠

徐璋字載南號玉章生而魁梧精悍過人好讀書以孝稱甲辰武進士補福建金門鎮守備獲大盜李大忠等二百餘人提金門遊擊因罣誤被

召入京死於途年將四十功業未竟時論惜之

義行

宋張阿崧捍海隄人文丞相赴國難微服轍軻經其地阿崧知非凡人留五宿聞追兵至阿崧遣二子戴葦笠衛送出境蓋好義懷忠隱君子也

元冒致中初家海陵元末爲兩淮鹽運司丞分巡豐利諸場多所興革商民兩德之至東陳遂致仕家焉僞吳張士誠聞其賢屢辟不就脇之入吳門封安督丞相力以疾辭渡江而還勤學好修聚書數千卷閉門開帙有傲南面百城之意

明范鏞字世輔個儻不羈宗嫺里閭爭曲直望之質成剖決無畸咸欣慰而去大人先生多折節與之遊然家日

漸落退徙村居與姪杰矢力隴畝業復振起歲饑流民
嗷嗷集河漚者百人錯憫之給粟分糜令畊織歷冬春
及夏秋授之囊橐使裹糧歸鄉里焉

謝叟居豐樂橋左蚤出田所於潦水旁得遺金三百餘乃
里人王某領解官稅也待旦訪還之又於所居井旁得
金三兩時有張秀父子以里甲催併鬻一女欲償官者
飲市中失去父子相尤方投繯未絕叟聞亟持金往驗
實歸之父子俱獲全事在正德初年

姜岱號南村居白蒲鎮南之姜家園性忼直能任大事嘉
靖間新鄭高相國惑聽奸民言謂興化糧重如臯糧輕
欲均稅法授意巡方使者檄甫下士民徬徨岱毅然正

色曰此非口舌所能爭也吾矢願傾家爲一方請命於
是鄉里好義者十人與俱往取臯土與興化土各負一
囊去祖行道上者近千萬人無不爲岱危至巡方使者
門見一人鮮衣怒馬氣勢赫奕衆莫敢仰視蓋相國家
奴也十人謂岱曰彼家奴且如此倘相國來吾屬無遺
類矣於是十人皆遁岱獨進謁巡方使者曰建均稅之
議者高相國也岱窮鄉小民何敢與之爭但不敢違者
祖制耳乃取兩土囊置堦下稱量者久之曰土瘠則輕
土肥則重相土輕重定賦多寡法創自太祖幾二百年
一旦以相國故易之其如太祖何況今日興化糧重可
加如臯設他邑賦重獨不可加興化乎今日之請爲天

下非爲一邑也。巡方不能折白相國，相國亦懼而止。岱以一介匹夫，奮不顧身，立摧權貴，救闔邑湯火，真豪傑丈夫也。

黃師臯，義民也。臯，江寧鄉漕田。明初強半冊於江及嘉隆以後，江沙漸漲，應補漕額，而奸民爭佃引蘆，政事例報獻誠意，伯請爲臯莊歲增籽粒課，而以冊江補漕田賦。灘賠闔邑臯民束手，惟相對泣耳。師臯不謀於人，自鬻腴產數百畝，裹糧走三千里，擊登聞鼓，白狀通政司。凡三封其疏，皆未報。於是搜其副稿，咨於總漕某，確勘情形。臯復泣訴各當路，爰得繪圖入告，除去冊田額賦。若干臯人至今賴之。

李某字道夫，正嘉間隱居南豐莊。性樸忠，不苟取。予有江南估客來販豆百餘石，其子爲家督，密雜以糠，粘十餘石而售之。道夫知而手其籌，故置十餘石不籌。客私曰：主人忘之耶？曰：否。否。語以故，客感謝去。子亦愧悔。

張洪字巍麓，世居豐利場。亢直好施，少從諸兄入太學。及期，應膺一命。洪曰：與其爲風塵下吏，何若作義皇上人乎？遂歸。恤喪周貧，掩無主幣，完孤孽，婚嫁，寵場夫以刑徒被遣至者，捐金贖之。姻戚友朋累負不償，洪悉焚其券，不較錙銖。子應騫，孫祚成，壬戌進士，別有傳。

許汝增字順濱，儒學前官河滌河。左右學博黃野王改河爲泮池，甃石成梁，規制宏厥，大類秦淮。創建之功，實自

汝增始

洪鉞字廷武幼聘范存靜女既而范女得癰疽疾范欲辭婚鉞堅不從曰女卽廢吾婦也棄之將誰歸固請娶之逾年生子璫甫三日范疾自起步履無恙後連舉五子人以爲異裔孫天祐斥五百金構房於城西爲宗祠亦有鉞之遺風焉

國朝叢秀林性亮直慷慨尙氣節排難解紛不避艱險尤樂

施與順治八年歲大歉江南北殍死者無算秀林首輸米八百石爲士民倡流民賴以全活縣令陳秉彜題園橋首善字旌之子七人中蘊丁酉舉人任淮安教授中綬武進士中綺中統州同知中紹中綸貢監生中綬邑

庠生

徐啟元字貞宇倜儻有大志沉默寡言尤好施與拯救顛危傾囊不惜順治己亥歲凶饑民輾轉道路啟元力謀賑濟先是啟元疾子勅爲父祝禱矢願修建城北玉皇閣至是命子勅斥產數千金尅日興役俾流離轉徙之民得自食其力逾年竣工所全活者甚衆深得古人救荒遺意人爭頌之縣令白大之旌之子勅以明經官陝西隴州同知到啟元如其官壽八十有五卒

石之璽字爾玉性抗直不阿入北雍值明季寇亂遂歸里絕意仕進立義田親族之貧皆歸之歲饑發粟施棉遠邇悉獲賑貸全活甚衆易簣日家無餘蓄子二麟善

麟義麟義任鄉城令有治聲封之璽如其官

胡邦化字季宇廉介退讓不務名利工詩善屬文通醫理順治間爲諸生屢以輟落歎曰窮達固有命非可以強求也遂杜門著書無絕座氛晚尤好善樂施立義塚於丁家所嘗施藥材拯疾苦全活者無算鄉里德之

高宗輔字君佐幼讀書天性孝友樂善好施教子延師極忠且敬三子皆有成長用世繁昌教諭次奕世太學生次巖官至戶部郎中別有傳

洪繼熙字仲敬居恒布被脫粟而濟人利物雖揮千金不顧廣置義田賑贍宗族鄉黨人有構怨者曲喻水釋之戚友或質遷失業熙力爲經營俾得所而後已子國傑

凡兩刲股以救父母之病熙嘗於狼山渡江舟覆溺水傑忘身赴拯父子俱得全

宗範字左三十歲能文二十舉秀才爲江北名士三十一舉於鄉臯僻濱海去上官遠明季猾吏奸胥藉興徭役前後沒民錢無算其最重者曰里長曰里書曰交兌曰遞年

國初一切與民更始而臯以僻故未悉除苛法範毅然列民疾苦狀請於令且將詣中丞臺尚書省令悚然出位揖臯人士咸集請如宗孝廉議令上其事於督撫悉罷之民乃甦至今猶頌其義焉少負大才好經濟之學考索輿圖河漕水利屯田積貯兵法鹽權諸書及歷代名臣

奏議日營指畫兼綜而條貫之已乃嘆曰其近之不理
遑務於遠於是拯臯民湯火中年及艾善病絕意仕進
惟研易象考樂律觀天文星經優游林泉而已

蘇應琛字子荆其先新安人卜宅掘港性成孝友而隱德
尤能及人撫諸弟有成掘港舊有范公隄歲久潰敗潮
溢輒浸民居居民苦之琛捐資修築鎮民由是安堵復
於掘港之前置義塚賑荒救貧頗多善舉

顧萬里隱居白蒲鎮其祖北居壽九十餘舉鄉飲大賓曾
捐金建鎮北石橋未竣卒萬里體祖志入山採石經營
數月屹然告成又置義塚賑饑荒壽九十有三

宗一新字懋明性樂施予順治辛卯歲大潦壬辰復大旱

新家故豐厚積穀數十萬一劫盡發以賑縣尹陳秉彛

嘉之請於臺以額旌焉

張在中字子理少有異才入成均六館蜚聲樂善好施有
鬻子償逋賦者在中惻然付金如其數俾父子完聚尤
好詩文偕同邑冒夢齡張玉成余庚倡和不輟

吳世則字崑崙周貧睦族一時宗戚里黨共稱長者辛亥
舉鄉飲賓卒年八十又一五

張應庚字君西洪次子也少失怙悲哀不已母李氏晝菽
誠勉遂奮志下帷弱冠遊上庠事母至孝事兄克謹撫
兄子如己子使就外傅暇則親督課之十年不倦姪祚
捷南宮君西之教也

如皋縣志 卷十七
許爲梅字季和以諸生入成均梅與兄爲霖同胞學生兄弟友愛同享耆壽九十三歲而卒生平廉介自持從未以一刺干邑令士林義之孫嗣隆以甲榜入翰林別有傳

許鳴陞字元韻年八十七仁恕樸誠隱居江村生平未嘗一至公庭邑大夫聞之屢以鄉飲資請皆不應

沙維都字汝宗少業儒入太學授鴻臚寺序班中年樂道自守以經學教子足不 城者三十年後得異人指點預辭親友而逝子鍾瑛邑庠生

沙維遠字君翊少失怙憤志讀書考授禮部儒士天性孝友樂善好施康熙丙辰歲潦民饑悉發積穀賑貧者已

未旱蝗田禾枯稿民皆流散復罄所蓄以濟有從弟行八者家計不豐苦疾病用藥調治及死具棺槨殯葬又有故友新安人胡姓者老且貧留之數十年病終復經理其身後事置買義塚修造橋梁施藥療病年登七十以子鼎貴贈承德郎

冒一舉字從薦累代簪纓不以富貴驕人案橫一經閒則課僮僕樹藝不問戶外事言坊行表鄉黨咸以長者目之

朱志古字尚友考授州同知明鎮國將軍顯忠十二世孫也世居范湖洲性孝友父早世奉事孀母單心竭力不分責於昆季家貲不甚厚而好善樂施不遺餘力邑有

女身縣志 卷十一
育嬰堂捐柴灣租田若干畝以助不給鄉里貧無殮者
每歲造棺五六十具以爲瘞埋又以楊家莊焦家埭田
四十畝施作義塚環洲河港每多坍灘互寒病涉偏造
橋梁以濟行人至於歲出粟米周親族睦鄰里蓋行之
終身不倦云

吳鳳翔字來儀少爲邑諸生名籍甚任盱眙訓導念盱邑
學宮荒圯捐俸修葺士咸德之勒石誌其事焉不樂仕
進告休歸里晚年好義益篤臯學舊有崇聖祠規模卑
隘咸議廓之顧儉於資鳳翔慨然斥千金獨建環除翔
棟繚垣馳道咸備已恐上雨旁風久而易圯復斥田百
餘畝歲徵租入修葺每念貧士之苦至歲暮集學舍以

贈之平生疎財仗義排難解紛能爲人所不能爲總督
那蘇圖疏稱鳳翔獨建崇聖祠捐米卹士凡銀二千五
百六十餘兩米三百五十餘石田一百餘畝應加一級
以示優獎

上可其奏長子之瑛字湯垂幼而好學爲邑諸生亦勇於爲義試
童子者闕坐器几案之瑛出貲置四百餘副以應其需
士林至今德之

汪士棟字梁若候選州同知先世歛人敦本睦族有長者
風尤孳孳好義慷慨周恤無幾微德色雍正甲辰秋海
水崩嘯溢捍海隄而入漂沒廬舍浮尸蟻聚士棟盡然
傷之親自捺舟破浪冒險率僕受男婦尸凡三千五百

六十有八咸構而瘞之援溺全活者數十百人豐利自海嘯後地鹵不卽生禾居民艱食士棟出穀千石爲糜以食餓者行之半載略無倦意州牧離使旌其閭爲義門又斥膏腴田數十畝爲漏澤園他如施藥送榭諸善靡不爲雖指困贈舟無以加也以子起瀾貤封儒林郎汪起瀾字千頃沉默寡言與人處和煦如春豐利俗奢上十場獨儉汪氏益之以淳厚志風土者稱仁里焉常艤舟馬塘見菽塚櫬新故相軋惻然傷之卽割近塚腴田五十畝擴其地甲寅沿海民病疫和藥劑徧惠鄉人賴全活者十之六七庚申歲饑戶給粟麥凡計八百斛又嘗於掘港設局施棺其惠和愛人樸誠應務有古道之

遺居平每以功過格自檢省刊有陰騭文註解行世子之珩議叙鹽課提舉司提舉有父風焉

徐德健字乾行豐利場人性溫茂而勇於爲善父大成以已置田一項餘送兄耕養年九十餘德健猶孺慕未嘗一日離膝下父遂坐享壽祺雍正甲辰沿海被風潮德健命家人飛舟收漂尸藁葬拯溺者全活之復炊粥食餓者月餘離臺縣有司咸旌其閭諸子承庭訓皆敦善行不怠以子承浩封儒林郎

吳執禮字周秩居車馬湖慷慨仗義有父鳳翔風乾隆三年皇邑歲饑隣近村莊窮黎乏食執禮傷之仿古社倉之制儲穀五百石春貸秋償不取息又斥田四百八十

餘畝歲入穀三百七十九石以爲義田隣族無告之家皆取給焉學院劉紹聞稱其贍隣睦族法良意美中丞陳可齋云執禮屢置義田族隣均叨惠濟洵爲樂善不倦總督德亦極口譽之諭布政司勒石以垂不朽執禮卒子積忠承志遵行勿怠縣令趙廷健白學院尹公製好義足風額旌之

朱學漢字粹章鳳台孫廷宮冢子親沒毀瘠哀感行路撫幼弟教育備至其伯廷宁贈以義方代父額性好施邑中學宮傾圮首倡捐貲修葺他如養濟育嬰施棺掩骼建惜字社義舉頗多子赤主簿丹從龍皆諸生

仲一成字聖瑞邑庠生永樂間其先世自山左遷如臯之

西場遂占籍焉少以詩名慷慨尚義性篤孝友孀母善病不敢一日離膝下有同族兄弟棄田與一成給以穀載歸至途中舟沉穀濕一成知之取其濕另給以穀凡卹宗黨賑孤寒施棺送絮見義必爲排難解紛鄉人重之

吳天鑑字式臨臯南車馬湖人家不甚富而慷慨好施每歲稔輒出穀粟活饑民爲鄉里倡遇鄉里無力殯殮者惻然施棺焉又捐高阜山十二畝詳請永作義塚布政司張渠旌曰尚義存仁里左戚嘖嘖頌其德焉

叢玉琳字季玉九歲失怙奉母至孝諸兄力學不治生產有無緩急惟琳是賴琳勇於爲善鄉里皆薰其德比之

王彥方云縣尹屢聘鄉飲大賓固辭不就壽登九十有

二

仲大量字爾雄慷慨好施濟每夏秋間廣施藥餌以療病人嘗煮糜以食餓者仁聲遠著制府高其倬聞其賢令縣尹給花幣旌之以子之珍贈徵仕郎

傅光煒字寅亮考授州同職事孀母以孝聞嘗捐腴田以瘞窮人遇歲饑捐米百石首倡賑濟布政司李蘭重其行贈以序子源溶皆有聲庠序

范雍字穆如號靜菴母早逝事父孝兄弟怡怡弱冠補博士弟子員貢成均多義舉議公擡輪戶派充之弊率捐義田睦族敦倫之誼篤其他恤孤濟貧爲善惟日不足

冒巢民顏其堂曰德醇可想見其概云

沈全道字探原號梓園和氣謙光與物無忤鄰里族黨皆以長厚目之生平見義必爲孳孳焉惟恐不逮書院養士育嬰卹孤捐育才圩及又東圩田備膏火乳哺費他若修學宮救饑荒施義塚皆踴躍輸貲爲邑人倡首江蘇藩司許題額樂善好施非溢美也

沈全遜字葵茲候選州司馬好讀書不求甚解性恬退於科名澹如也孝於親友于兄弟富而好行其德遇歉歲貧苦親鄰求無弗應無弗滿其願以去其父西山倡建崇正書院捐田爲膏火貲踵其事力行之子爲儀爲仁捐洲田三百五十八畝又捐洲田二千四百二十餘

如皋縣志 卷十七 全
畝於育嬰堂亦善承父志者矣

吳執衡字仲山捐職州同好義舉學前舊設木橋獨解囊
出二千金建兩石橋曰文德武定捐學田並施田育嬰
堂現撥普濟堂收租其他憐孤恤死周急濟貧不一而
足子疆乾隆庚午科舉人孫廷堅生員

馬日光字耀生孳孳爲善建宗祠修族譜雍正中海水數
湧溢范堤被決傷禾稼漂男女竭力拯救具舸船給衣
食全活無算年九十二歲

恩賜冠帶

兩膺粟帛妻陳亦九十有二督學曹秀先題額椿萱垂

蔭子大良己酉登賢書

冒天錫字廷榮康熙丁酉科舉人候選守備性剛方急公

好義雍正中年饑亟請邑令馮募夫濬河給粟以代賑
同年曾病逆旅延醫調治歿爲具棺殮護其喪以歸有
窶甚鬻妻償負者將離去婦姑相持痛哭立傾囊資贖
之俾一家得安全其他重然諾尚節概多爲人所不能
爲卒年七十七子國柱恩貢生國棟邑庠生

張志芳號裕堂貢生一富子性敦篤慷慨好義無吝色亦
無德色厚親族恤鄉黨濟急扶危常如不及或貸金弗
能償呼其人至語曰若貧困甚可憐勿以此爲意立取
券焚之前後約數千金乾隆丙子歲大饑罄歷年所儲
粟以救饑夫全活無算邑有大事資擘畫修學宮及普
濟育嬰堂皆探囊輸資爭先恐後生平樂爲善又以涵

如皋縣志 卷一
養德性樹立勲猷非讀書不可延宿儒訓子孫子杼早
歲遊庠爲名諸生孫顏知薊州涪湖北襄陽府知府灝
署長沙縣丞

張志爵號名表生平孳孳爲善修祠廟造橋梁書院及育
嬰堂皆捐重資無吝色子拱官湖北襄陽府經歷移疾
歸好善亦如其父云

吳如升字旭輪貢生樂善不倦斥腴田三百畝租入周親
族貧乏者歲以爲常構修桂樓延名師集邑中寒畯讀
書其間多所成就有婢良家女常夜涕不欲爲奴詢得
其情立焚券令歸贈銀數十兩四方名公卿樂與遊以
其好義重之

仲之珍字寶山號西圃侯選州判生平慷慨好義建文昌
閣修永興闡學宮書院皆探囊出資爭先恐後其他鋪
街道救饑荒不可以一二數所謂吉人爲善惟日不足
者也子元鰲候補同知耀賢捐職主事元長太學生元
龍候補銓布政司理問

黃衍字嘉燕天姿英敏補博士弟子員貢成均性孝友生
平樂善不倦立宗祠修族譜遇歲饑出粟千餘石全活
多人請除坵糧董建書院殫心擘畫不遺餘力葺學宮
以崇聖教助膏火以育英才散穀施樽無歲不然大中
丞莊滋圃表其閭曰惠濟桑梓衍兄循無子以次子大
鶴爲嗣廣東廉州同知大音布政司理問大鵬廣西宣

化縣知縣大鵬候選縣丞孫慶堯廣東番禺縣巡檢濠
廩貢署山陽訓導若沅戊申舉人婺源學博授中書
汪起漣字步周號蒲洲弱冠游庠文名噪甚屢試棘闈竟
不遇遂援例入成均候選儒學司訓敦孝友崇信義遇
歲饑輸金助賑全活多人子之璟之琦孫爲霑皆攻舉
子業克承家學之璟號魯珍天性純篤有父風
王大溥字博然生平樂善值海潮湧溢收浮屍殮瘞之貧
不能葬者與之棺他若造橋捐田修寺施藥或入碑記
或傳誦人口固邑中好義人也

朱國勛字元宰號雲莊候選州同知性孝友多義舉乾隆
乙亥及乙巳年饑皆出米麥二百餘石濟饑人棉衣藥
糶歲施不倦卽其村曹橋構市房百餘間僦居謀生者
衆咸德之呼爲元興鎮地以人傳其人亦可思矣年八
十有五子允祿候選理問孫清渠以廩貢候選訓導歷
署句容邳州司訓清淞候選吏目分發陝西署朝邑縣
主簿清洛清源俱監生曾孫琛李郡守首拔遊庠惜早
逝

湯秉忠字質葵太學生事親孝友于兄弟性慷慨勇於爲
義族親閭黨中困乏者量緩急隨時拯濟施棺施藥歲
以爲常乾隆丙子大飢盡出所儲粟助賑人多倣效踴
躍捐輸石莊嗷嗷數千人皆得全活更涉江買穀平糶
沿江數十村賴此不爲溝中瘠州牧王公以敦厚崇禮

如皋縣志 卷十一
題額贈之他若修亭造橋築埭諸善事不可僂指數蓋終其身一好義人也子式增貢生工詩文善畫因病功名迺遭典庠生早卒咸附貢生謨國學生植品好義俱見家風云

陳鼎鍾字光泗號春容邑庠生每遇歲飢設法拯濟捐資不吝辛未乙未丙子戊子數年中賴全活者多至數萬人請塞徐家壩以除害奉范文正公主以崇祀先賢設棺瘞枯骨施藥救疫癘好義樂善至老不衰年八十有六卒季子秉仁字東昌號長菴太學生乙巳丙午荒旱倡議輸財助賑癸丑冬獨出廩粟施粥兩月修學宮濬泮池市河皆鼓舞爭先生平多義舉類其父云

葛立字徹明弟韜字六宜以其遠祖四川長壽令葛錫前曾捐置祭器貯學宮歲久剝敝無存於乾隆二十四年兄弟共捐貲置祭器畧備邑令何記其事勒碑學憲劉題額功圖存禮更賜冠服事關祭典其爲人贊賞也宜哉

仲之琮字蒼壁號柳原候選州同美鬚髯能詩時寫墨菊一兩幅好善樂施置文廟祭器助書院膏火輸貲恐後有古樹園山陰胡裘錚嘯咏其中數年死卽卜園側地葬焉人以爲義

石師字律也號吉山候選主簿其先世爲崧爲桂爲岩兄弟第宅隔河東西爲雁橋往來甚便歌式好敦友于也

女學集志 卷十一
值傾圮師慨然修之勿墜前徽他若救饑餓瘞死亡皆踴躍輸貲惟恐不及焉

黃封字天爵性謹厚見義必爲菴觀橋梁建修不一而足子世巖浙江温州同知

黃家健字體乾敦孝友重然諾好施與人稱長厚乾隆辛未其田畔有古墓湍水激嚙得壙版辨其字畫知爲宋司諫陳忠肅公瓘墓謁邑令乞申請奉忠肅公木主於忠武忠烈祠內爲三忠祠訪陳氏裔孫奉祀勒石垂久遠錢維城謂爲有心人真有心人也至發粟賑饑施糶掩骼出貲造橋諸義舉甚多子國豫明經候選訓導著有越艇集海陽記逸若干卷孫端廩膳生寧邑庠生

方祖蔭字立齋號駿文廣東德慶州吏目慷慨好義邑中修學校建祠宇掩骼埋胔皆探囊輸貲無吝色卒年七十有五子魁邑庠生

劉學成字康懷號心遠候選州同知性至孝少失怙築室依廬奉母陳終身若孺子慕生平好施濟戚黨貧乏者輒陰厚之歲饑出粟助賑又疫作施棺槨置義塚馬家庄其樂善如此子巨源附貢生箕候選鹽經翼國學生范毓璣字鏡符號嘯菴事親孝兄盲扶持惟謹至老彌篤好周恤貧困遇疾病送藥餌乾隆五十一年大饑捐銀四百兩助賑更施粥活饑人甚衆建宗祠捐丁家所唐家缺地二十六畝餘以爲祭田其樂善不倦如此

鄭國瑞字六餘號諤軒候選布政司理問性伉爽勇於爲義創建宗祠修祀事敦倫理至戚家中落分宅給粟數十年周卹無間貧無葬地者捐田葬之年七十卒子家模家樞俱邑庠生

袁允字彭年號培蘭官山東濱州吏目福建甌寧縣丞丁母憂自甌寧歸里董修文廟創建橋梁救飢民修壞道多義舉後授陝西寶鷄縣丞以足疾歸子四長守泰袁守泰字惕也號省齋援例捐府經分發湖南借補沅陵縣丞以父憂歸居鄉力行善事能繼父志云

吳嶷字蒼亭號青田候選布政使理問少失怙負米邗江奉孀母邗江大賈識嶷長者延主鹺務家漸豐饒好施與不欲人知每除夜貫青蛛裹白蠟腰纏手挾往返閭里知甚貧窶者或拋門內或擲垣中子姓輩謂嶷招之來而分給之不猶愈於以暗投人乎嶷曰若是則余得美名而人知所感且恐廉潔之子面却不受反愧余心其行善不求人知類如此子履中好學未遇履中子文祥文聰文聰邑廩生又祥舉孝廉積善之家必有餘慶信哉

吳敏政太學生以子柏官亳州訓導蒙城教諭封修職佐郎年九十有三濟貧窮周急難修登津迎嵐二橋及法寶寺碧霞宮蓋終身樂善不倦人也

叢合武太學生性長厚樂爲善或負千金置不問子永年

主簿孫傑廩生

徐承浩字英士號養齋性質直解紛排難不避嫌疑好施予雍正甲寅歲飢乾隆癸酉又飢丙子大飢皆出積粟拯濟全活無數子宗永河東中場鹽大使以孫朗晉贈朝議大夫

徐福字佑洪號梅屋候選州同性孝友處宗族鄉黨和平樂易有構怨者必委曲解之乾隆庚午歲飢出積粟拯救及癸酉丙子又飢家已不甚饒慷慨拯救如前時誠敦行不怠人也年八十卒子宗元孫珮未冠遊庠

徐旭字昇暘號曉峯乾隆丙子大饑旭傾困與兄浩福協力救饑民多所全活窑灘土山側地窪瀦水叢塚被漫

沒率傾圮旭出貲鳩工撤水盡遍等遺塚掩幣埋齒復壘土四周為防水計有災民寓里中偶他出室被火三棺難焦旭率眾急為撲滅具槨使葬焉皆義舉也子炯吏目炳文學忻河南鄭州知州孫銑縣丞靈府通判目縉字霖蒼國子生生平尚氣概重節義明季流賊之亂其叔祖起勳被害妻李以身殉百餘年來湮沒不彰力請大吏陳奏於乾隆十六年得蒙

恩旌表

葺宗祠修族譜立風憲坊皆倡首捐貲歲飢賑粥病疫施藥隨時拯濟不遑曾路過湯家灣拾遺金百兩候失者至詢得實立還之至今猶嘖嘖人口子普太學生

楊扶倫事親孝父時雍鰥居六十年問視無倦壽登九十

有九皆其孝養所致性尤好義乾隆丙子及乙未乙巳歲飢迭次竭力捐貲以賑飢黎全活者多人咸義之楊時璉太學生每遇歲饑輒捐貲助賑丙子戊子乙未乙巳皆拯救恐後其好善蓋終身如一日也

吳積仁字善長祖鳳翔獨建崇聖殿父執禮置義田贍族人積仁與弟積忠承祖父志樂善好義終其身孳孳不倦焉

曹應魁字士元乾隆二十一年歲饑魁於通衢施粥往來饑民多所全活其饑斃者具棺殮之三十二年又饑五十一年大饑其設粥施棺如前時修補橋梁往往獨解囊橐無難色孫若琳邑庠生好義頗類其祖以療疾前

亡

陳麟兆號玉山候選州司馬望重鄉閭七十六歲卒生平輕財好施乾隆丙子捐穀百餘石救饑民復率眾捐貲船戶賴全活者無算邑中義舉知無不爲子桂芳布政司照磨桂蓉巡檢爲弟麟秀嗣丙午人多病疫桂蓉出銀二百兩施棺槨亦善承父志者也

沈爲麟字嵩高附貢生生平多義舉修祠廟救饑荒施義塚造橋梁蓋不一而足也

范曾耀字倫賢國子生候銓主簿弟曾述字歐賦附貢生兄弟最友愛年登耄耋白髮粼粼猶怡怡如也遇義舉慷慨好施曾捐文士義塚出鄉人皆以長厚目之

張從先自奉儉約雅好施濟廟宇橋梁捐貲修葺貧不能殮者予之棺又置田爲義塚以備葬焉年七十有九

沈爲嶧字樊桐候選州同父全道以好善著嶧繼志不怠凡邑中里中公事踴躍赴之每以不及知爲憾篤於孝友居鄉無疾言遽色家素封而飲食衣履無異寒素人尤欽其儉德訓子以義方謂讀書有裨身心非徒獵取功名爲也以子鳳岩捐職理問加四級封朝議大夫

陳岡字扶三太學生人品高潔通醫理乾隆丙子大疫貧苦鄉鄰悉往診視施藥材全活甚衆丙午歲饑傾囊助賑每歲暮多施予周急濟貧無吝色年八十卒子元襄附貢生元弼候選主簿孫士達士廸俱邑庠

王順溪字御瞻號碧崖太學生慷慨好施乾隆丙子大饑竭力拯救全活甚多乙未又饑出粟平糶前後州牧題贈名許清高任卹爲懷二額七十餘歲卒

吳崑字輪秋號素園樂施予族親中婚娶力不給者探囊助貲無吝色爲友貸金友窶甚不能償權子母立已券代償之通醫理每歲以藥餌活人甚衆

石中瑾字汝懷號鍾山才高嗜學年十七補博士弟子員善承父訓母歿悲哀泣血事繼母先意承志曲得歡心於諸弟最友愛乾隆五十一年歲饑出粟米百餘石助賑多所全活佃戶田租概不取更計口多寡給以粟貸金幣者悉焚其券他若治道路修橋梁踴躍輸貲惟恐

不及子恒豐復泰國學生履謙庠生

管世發字自強號健堂性至孝與人交生死不相背負里中有齟齬不合者輒爲排解人咸服之

管升字允猷號楚堂多義舉遇歉歲竭力拯救貧民鬻子女者代贖之修長堤行人稱便

沈爲轍號式如候選州同乙巳歲饑捐銀千餘兩助賑全活甚多遇邑中修城垣葺祠廟皆竭力襄事惟恐不逮田鴻賓因營防港淤塞捐貲開濬南接碾砣港疏濬通達俾四十八圩田盡成膏腴鄉人賴之施地爲義塚又澤及枯骨矣

孫嘉椿字愷士樂善遇歲饑救饑民無算大修城時骸骨暴

露者拾而葬之施義塚田若干畝

范驥字德也慷慨好施遇旱荒請邑令舒設廠賑粥出已貲助之饑民多賴全活議敘州吏目未仕而卒

劉大章字唐豫太學生乾隆丙午歲饑爲食以食餓者旋置粥廠於甘露菴日給丁口錢文前後計四十六日出貲三百餘金賴存活者數百人真義舉也

羅紹美字景西爲人端方淳謹樂善好施親族中有貧不能喪葬婚娶者必仗助以成之歲荒則出粟以食饑民全活甚衆嘗置義塚建市橋六奎殿里人德之見義必爲老而彌篤登膺

皇恩年八十五卒事詳石港場志

羅鼎字典簧上舍博學工文尤好義遇歲饑出積粟助賑貧民賴全活者甚多

沈鳳巖字于岡爲嶧子入邑庠爲文本先民矩獲得舅氏錢標林之傳後遊江都李道南門以偉器目之鄉試屢薦不售捐職理問生平承其世德以力行善事爲務修聖廟大成門武廟三義閣及本鎮武廟濬河助賑皆不惜重貲成之人謂以義世其家云

鄧樽字黃中號柏亭性篤摯事父母食上必在視寒煖問起居進退敬以愉親歿哀毀骨立忌日有感容念天顯克恭厥兄姊適顧年餘翁姑與夫相繼亡家徒四壁遺腹舉子卽以女字之更多端周卹俾姊心得安撫孤成

立遇年饑貴糴賤糶復捐貲助賑全活無算刻丹溪救急方四卷遠近利賴焉訓子以義方子細繒俱有聲庠序

李士周國學生精岐黃術乾隆丙午戊申間饑疫出粟助賑設局施藥全活多人著有醫錄藥考諸書

洪世授邑庠生性慷慨乾隆丙子歲荒廢產捐施妻樂氏並罄釵珥助之鄉里咸稱義焉

湯泰和字日陞岔河人性好施濟每遇歲歉卽捐穀以賑饑黎修葺寺觀橋梁不吝重貲嘗建準提菴置田以供香火見病丐棲止各廟穢褻神像造義舍庇之未及終事而卒以孫述曾捐貲贈朝議大夫

湯心田字世賢泰和子好施予克承父志以父臨終遺命造義舍以庇病丐卽獨力建設十數楹風雨寒暑得所棲止咸感其德更施棺以殮置義塚爲叢葬地申詳立案藩司孫深爲嘉獎以子述曾捐封朝議大夫

沈全連字貢德號萊園國子生性恬澹不求聞達事親孝父母先後病劇俱割股以療凡兄弟親戚間有所需輒推解弗倦乾隆丙子歲大荒破產賑濟不下千有餘金及身歿妻夏氏尤能遵遺訓撫孤克底於成子思洪彬思淮彪彤皆蜚聲膠序彪其中子也甲寅科中式江南解元壬戌科成武進士

徐立本篤厚宗支臨終囑其子置田以供祭祀宅畔建義

塾聚族中子弟之貧者教之筆墨膏火皆取給焉子大鶴至今奉行不怠

薛林字懋遠號梅苑其先甘泉人自揚州遷居邑東丁堰鎮少孤事母孝撫弱弟克以成立林工長桑術貧者絲毫無所取富家所饋輒不辭曰吾以有餘補不足也會里中大疫自提藥囊排闥就視活人無算丁堰當水路之衝歲旱甚河水涸膠不得進者數千艘嗷嗷無所覓食林倡義出貲勸捐遍給之凡五閱月大雨舟乃通又修鬼橋濟行人增修福宇寺殿臺三十楹其平生義行多此類子學詩歷任直隸景州順天東路廳趙州等官賢聲噪著顯秩洊登皆林之訓也以子官累封朝議大

夫卒年九十歲子一長孫焜候銓知縣次潢曾孫二葆初寶泉四世一堂德固盛福亦隆矣

黃興祚字紹翼號芝田爲人飭躬自守利人必爲雖年及期願猶孜孜不倦嘗捐藏書萬餘卷於學宮供士子誦習子理績承其志三院皆檄司獎勵之

沙樹典字式杜捐職理問爲人慷慨好義邑有公事無不竭力經紀充普濟堂董事二十餘年掌管租息出入撫恤疾痛優給窮民雖家居石莊恒終歲在城無安處也乾隆丙子歲大饑餓殍盈野典與本鎮同志籌辦南沙一帶部署賑粥平糶之法土著流徙均沾實惠州牧王公繼祖題廉惠可風額贈之承辦西河灣河工濬深葺

固本道王公之錡大加稱賞旌其廬曰惠心篤行他如修廟造橋諸善舉尤更僕難數子四長熙綬貢生次熙純直隸南宮縣縣丞次熙綸考授主簿次熙縉布政司理問俱克繼家聲云熙純別有傳

沈鳳佐字襄采號靜齋幼穎敏而端謹如成人胸山吳九齡離使一見目爲遠到器以女孫妻之長益俊邁從陳在山期以大成願以父爲隣老且疾亟代督家政因援例得郡貳居鄉多義舉務實效邑文武廟書院育嬰堂捐貲重修無吝歲歉倡賑貸董其事甚力施糶千餘具沈氏固以長厚世其家佐尤克恢先業丙寅春謁選分發赴楚卒於道年僅四十一遠近惜之

如皋縣志 卷十七
叢之浩字養正號石齋少補邑諸生困棘闈者六十年嗜學不倦性至孝奉祖母及孀母皆色養無違家不豐而修隨甘毳必備自奉則泊如也祖母壽近百歲母氏亦逾大耋里人咸謂浩先意承志所致平生勇於爲義學校有公事皆竭蹶以赴歲歉則倡勸捐賑不憚勞不惜費兩膺粟帛年八十二而卒

朱洪壽字冠五號靜原昂子也幼秉家範讀書明大義長以孝謹著魁梧磊落人以大器期之旣而怙恃相繼失自念一官小效亦足爲顯揚地遂謁選得湖南永州府江華縣錦田司循分奉公不肯妄自菲薄大吏嘉其勤慎旋署長沙縣丞事供職維謹復以叔昇老且病弟洪

達早卒無人奉祭祀乃解組歸居鄉好行其德有義舉悉贊助之媼戚告匱賙恤靡間臯邑距白門近千里鄉試者往往以資斧艱而輟壽斥田二頃一十一畝零每歲收息約二百金至賓興之年分贈寒賤俾得束裝就道自是赴棘闈者逾常額焉邑乘久未修暨同人倡議續刻搜羅軼事表揚不遺餘力志甫竣而歿年僅五十有三子章鶴

吳永譽字令聞車馬湖人家貲不甚厚而慷慨好施晚年彌篤湖上舊有關帝廟規模狹隘譽謹遵父命慨然斥千金卽於廟後式廓基址創建三義殿鳩工庀材廟貌煥然一新平生樂善不倦年饑有指困之誼歲暮有恤

如皋縣志 卷十一
乏之惠隣里無力殯殮者每歲造棺數十具爲之瘞埋
又捐高阜良田十三畝五分永作義塚環湖河港爲來
往通衢譽修橋梁以利行人里黨咸頌其德焉
范維鍾字聲宏號實夫援例授州日分發直隸性倜儻喜
任事凡邑中賑灾濬河葺儒學修縣志必以身先其源
委利弊悉能娓娓言之故當事者多所採擇雖事成衆
舉鍾恒倡其始焉卒年八十有五子二叟牧俱國學生
石恒豐字衡峯中瑾長子讀書入太學性孝友克承父訓
治家勤儉復慷慨好施敦宗贍族凡有婁者饑爲推食
歿爲具槥婚嫁無措者爲之完備人咸以爲有父風焉
子永成永譽永清俱列成均

沈爲仁字進淳號藹軒少聰穎讀書日數行下從師姜退
耕太史與江葑船程晴臯顧木原結爲文社每試列前
矛幼失母哀號若成人事繼母程盡孝與兄同居數十
載友恭甚篤讀書之暇兼工痘証施藥餌活嬰兒無算
有痘仙之稱生平多善舉丙辰捐銀八百兩爲書院膏
火育嬰堂公捐沙田數百畝他如修學宮濬河助賑俱
不惜重資親族更多任卹闢東園濬池疊山爲課子之
處庭訓極嚴老年扶杖花陰聽讀書聲怡然自樂年八
十五無疾終子源高郵州學正溥布政使經歷洞庠生
汪之琦字宋勳起漣次子幼承庭訓習舉子業試輒冠其
儕偶數奇未遇賚志以歿生平多善行家非素封而輕

財好施恒為鄉里倡丙午歲饑傾困解橐毫無吝色族
 黨有喪葬婚嫁不能舉行者多賴之子為齋為霑敦本
 重學猶不忘父訓焉

耆壽

胡申穀字念貽號樸園太學生議敘縣丞以母冒年邁不
 忍離左右遂不仕父香山官侍御子之祁縣令之郁州
 倅穀秉性謙和持身恭儉不以富貴驕人孫曾繞膝時
 訓以敦厚退讓彷彿萬石家風宜其福臻厥躬壽躋期
 頤也年九十有九

吳際昌字韋亭年八十一歲遇

純皇帝開千叟盛宴以八品冠帶匍匐

丹墀蒙

恩賜鳩杖銀牌千載

曠典也卒年八十有八



如皋縣志 卷十七
施景禹字澹源太學生工書畫精篆隸好客四方名士多
與遊遊江夏周覽匡廬彭蠡諸勝悠然有遐想築室江
干自題停雲寄廬集朋輩觴咏其中陶適性情優游自
得乾隆六十一年

純皇帝開千叟盛宴恭逢

曠典得觀

天顏蒙

恩賜鳩杖銀牌絹帛真異數也卒年七十有七子鏞湖南新陽縣

巡檢

朱三允字繼盛明鎮國將軍顯忠裔孫淳樸古處有懷葛
風年九十七卒

紀東海年九十二歲長子孔昭孫正南正學會孫沅愷沅
長沅達沅宗沅連沅龍元孫允康允安允才於嘉慶八
年九月二十六日躋公堂耄老艾壯幼弱前後拜跪領
五世一堂額兼蒙酒食白叟銜杯黃童捧果有依依膝
下狀洵哉

昇平人瑞也非我

朝重熙累洽厚澤深仁何以有此

冒車書字富五大學生天姿俊爽博覽詩籍為文守先輩
法度削墨引繩尤工詩跌宕排奐卓犖不羣年八十有
四

恩賜粟帛八品頂帶

朱學穎字孔達號巢侶伯望次子性醇謹處鄉黨恂恂似不能言壽八十八妻沈氏孝慈淑慎偕老如賓壽八十七兄學廉庠生弟學領學乾皆七十以上長子履新壽九十蒙

恩賜八品冠帶間黨艷稱之謂一門壽考長厚之所致也

石長至字復也敦倫紀尚氣誼接物如皎日不阿時好家承一脈書香課子維嚴邑中公事諸推領袖晚年蒔花種竹搜羅書畫古玩以供清賞年八十七無疾終朱楡字雨時號容邨太學生學穎仲子出嗣族伯果果律身謹嚴動守禮法教子孫以敦厚退讓楡奉教惟謹終身如一日讀書以外無他務善小楷教授生徒多所成

孰年八十有五子大剛增監生大淳監生

羅昆性疎散詩情毫邁子克昱庚午舉人鳳陽教諭工詩善畫現年九十

李天培字承佑號約齋聰明好學蜚聲庠序性恬澹不求宦達案上古書數卷庭前異花數十種煮茗銜杯優游自得年八十有二無疾而終

朱楸字林在號竹圃候選主簿為人敦厚周慎不苟言笑閉戶焚香謝絕外事室中惟藥爐經卷而已工岐黃術時以刀圭活人年八十二端坐而逝

冒煌字增輝放達不羈辨才無礙遇族親爭曲直出片言排解人咸服之與胡申毅日夕過從有城南二老之目

卒年九十有五

冒緯字右弼然諾不欺人推長厚善堪輿不泥於此嘗語人曰地理終以天理為主耳此語的當不得視為老生常談也年八十有八屢蒙

聖恩賜粟帛

宗長春字天培號篤齋補博士弟子員幼失怙母冒病目侍左右謹護持數十年如一日讀書博洽為文敏捷老益嗜學不厭年八十有二遇

純皇帝萬壽蒙

恩賜粟帛子兆寧入泮早卒孫佩鸞邑庠生

劉元祉字天綏太學生持躬謙下待物平恕鄉黨皆以長

厚目之晚年好靜構西村草堂灌花種竹其間時手把

一卷吟咏弗輟年八十有七卒

范佐字輔宸秉性肫摯多義舉卒年八十曾蒙粟帛

恩榮子章郡年八十有三孫曾繞膝亦

盛世人瑞也

黃元炳字蔚文號文也考授州司馬好施予八十有六歲

卒子學城湖北江陵縣尉在官勤慎卒年八十孫鑑布

政司經歷

范章邯庠生孝友素著教子以義方八十有五歲卒

劉無忝字夙興能詩語多豪放年八十三歲卒

石瑾號符玉美鬚髯閉戶窮經至老不衰年九十一以諸

生終子思任天柱縣尉

石琛號獻其年八十三性孤潔足不出戶庭好內典嗣子

淞增廣生

袁憲文字時敏候選州同得導引之術年八十有六蒙

皇恩兩膺粟帛妻劉氏現壽九十四歲

石銀字利玉號墨樵讀書入成均性豪俠遇奇人傑士艱

難困苦立傾囊中金以贈嘗之魯之齊之楚越歷名山

大川悲歌慷慨晚歲蒙

恩賜粟帛兩次年八十卒子渠邑庠生

劉禹勛字武承重然諾荷粟帛

恩施卒年八十有二

顧仁蔭字明遠年八十一敦厚思慎里黨交推子瑩歲貢

生孫崧壽補博士弟子員

紀湧字崇效丙子科武舉人樂善不倦祠廟橋梁道路往

往捐貲修葺年八十六卒

管湖字天池性廉讓為諸生六十年事母至孝鄉人敬之

壽躋耄耋八十二歲無疾而終子樸櫟孫煦庠生

蔣金山年八十六子德成孫卓倫曾孫淇元孫維禮五世

一堂固壽寓瑞徵也

尤國生壽八十七歲子天富孫敏儒曾孫正榮元孫景春

五世一堂乾隆四十九年具報奉

旨准給銀兩綵緞昇平人瑞額

外皇縣志 卷十七
旨准給銀兩綵緞昇平人瑞額

何裕忠壽九十三歲子紀昌孫星照星耀星德曾孫篤慶
篤初元孫觀五觀六五世一堂乾隆五十五年具報奉

吳宏宴監生壽八十三歲子聿敬聿敘聿慶孫燦煜顯泉
煥炳灼曾孫邦殿邦棟邦寧邦璉邦璣邦瑚元孫攸疆
五世一堂乾隆五十五年具報孫顯渠候選從九

桑愈春字維新豐利場人生平淳厚樂善可風嘉慶六年
壽登百齡現在具報建坊

桑愈玉字尚珍愈春弟現壽九十歲精神矍鑠兄弟友愛
人皆羨之

寶之醇舉茂才六十六年閉戶讀書積館資濟人之急里

有周貞女爲立祠奉祀並助建文昌樓人稱其義現壽
八十七歲

朱閔受候選州同事親孝父病割股和藥以進並爲嘗糞
翼日果瘳父歿哀毀骨立終身不純采邑令魏錫祚贈
以國人稱願額壽八十一而終

叢熊飛邑庠生父疾割股和藥以進未瘳母疾又欲割股
母叱責之乃止孝名傳里閭壽登八十二歲

于寬潤孝孀母居鄉長厚足不入公庭教子有方子端早
入邑庠孫列成均兩膺粟帛壽登八十六歲

蔡秉仁候選從九品好善樂施嘗獨修宋家橋郡尊李逢
春贈以積善餘慶額壽八十二歲

郭士琇字名望以孫龍標貴封武德尉壽八十九歲

郭鎮字重安以子龍標貴封昭武都尉壽九十二歲

陳應鶴現壽八十三歲嘉慶元年膺粟帛九品頂帶

吳敦常現壽八十歲嘉慶三年膺粟帛九品頂帶

曹大茂壽登八十五歲膺粟帛一次

曹發枝壽登八十八歲膺粟帛二次

黃茂昇壽登九十三歲膺粟帛二次

沈之瑜現壽九十一歲膺粟帛二次

宗遂現壽八十一歲膺粟帛一次

徐觀誠監生壽八十六歲膺粟帛二次

范大鼎壽八十八歲

范果字碩其父大鼎疾侍湯藥衣不解帶者經年父卒事

死如生現壽八十九歲

朱淳源字雲蔚賦性敦篤天倫內多樂事生平與世無爭

享壽八十有五子為助孫碩存俱文學生

蔡昇公壽八十六歲膺粟帛一次

陳繼祖壽九十三歲

江大鈺恩貢生現壽八十四歲

楊耕餘壽八十歲膺粟帛一次

冒大器現壽八十歲膺粟帛一次

蘇兆龍現壽八十歲膺粟帛一次

張思聰壽八十歲膺粟帛一次

何若尹壽八十一歲膺粟帛一次

吳之書壽八十一歲膺粟帛一次

程東山為人肫篤教子有方現壽八十一歲子榮先孫啟

元俱衛千總倡鋪馬塘石街以利行人

吳文裕壽八十二歲膺粟帛一次

林漢文壽九十一歲膺粟帛二次

孫承楷監生壽八十四歲子天衡庠生

沈坦如壽九十二歲

沈錕壽八十六歲

范文藻壽八十五歲

范章都壽八十三歲

羅最壽八十五歲

胡錦芳庠生壽八十三歲

胡之本附貢生現壽八十四歲

趙煥現壽八十二歲

范章郁奉嗣父孝長厚端謹壽八十一歲

金惟隆壽九十歲膺粟帛一次

金石渠壽九十七歲膺粟帛三次

金其章壽八十歲膺粟帛一次

劉觀瀾監生壽八十五歲

劉學圃監生壽八十一歲

許瑤字玉裁生員壽九十九歲

李本昌字深源生員壽八十六歲

宗學洙四川吏目壽八十歲

冒四思候銓州同壽八十六歲

許潛字爾曾監生少負才能邑公事皆力襄之壽八十四

歲子栗邑庠生

沈為仁現壽八十歲

錢寶生員京兆五世孫壽八十七歲

章宏毅壽八十三歲膺粟帛一次

陳敦儀壽八十六歲

陳範遠壽八十四歲膺粟帛一次

章天安壽八十四歲膺粟帛一次

錢國珍壽八十歲

雷永錫江西人寄居如邑壽八十二歲

雷明德江西人寄居如邑壽九十一歲

范維鍾直隸吏目現壽八十五歲

吳韶音年八十八歲

郭斯彪字炳文太學生世居南鄉郭家園賦性醇厚事嗣

母貞女吳極孝子七人教以義方振宗早歲遊庠入成

均應京兆試振吉陝西長武縣典史孫遇福建金門縣

丞署同安縣知縣事子孫林立優遊里閭年九十四兩

膺

恩賜粟帛例授修職郎儲贈文林郎

姚鳳年字鳴岐號春圃性誠樸慎言行安約樂與物無爭
鄉里賢之壽逾八十強健勝於壯者

紀泰字志同號怡軒庠生世居縣北柴灣重然諾里有不
平排解卽帖服歲遇災祲倡首捐賑一方賴以全活他
如修古剎建橋梁類多義舉壽八十有五子三朝楨國
學朝標朝榦丁酉庚子先後登武科

方技

明張榮字伯仁常山人移家如臯少精岐黃術人以疾請
無蚤夜無寒暑雨雪無不赴者投匕劑輒奏奇效至報
謝有無不問也嘉靖己未邑有倭寇崇陽劉景韶以兵
使者提兵境上挾以自從會軍中大疫榮起者千餘人
隆慶末下邳有治河之役大興卒徒臯人負甬者千二
百而疫死過半榮自請往治焉至則夫役俱就地架茅
蓬卧其下一一匍匐人人視而人療之皆得生還不費
縣官一錢也嘗手致千金好施予窶人有謁者無不應
往往折券棄責卒之日家無餘資子孫今爲臯人玉成
文行尤著

如皋縣志 卷十一
曹醫察齋一日行途中聞有婦臨蓐者作楚特甚曹拾地上敗葉命煎湯服之卽下人叩其故曹曰醫者意也吾取其敗落耳衆服其神

萬歷甲寅夏有賣藥人挑藥籠至市中俄有兩人肩一病者求醫病者遍身皆刀斧痕頭項尤甚取其頭置膝上以藥塗之安置安帖視聽如故兩人復肩而去酬之以錢不受觀者如堵未幾遠逝不知所之惜不叩其姓氏然技亦神矣

國朝方欽字席儒性孝父疾彌年湯藥必親嘗後進衣不解帶者跨積寒暑於是講讀醫書遂精其術因請診視者日多遂棄舉子業就國子上舍考授州同知康熙丙寅

年邑多疾疫所全活不下萬人性好施予貧者施以藥其無依者令家人代煮與之飲或有物故者爲備棺器斂葬之嘗施田於育嬰堂親族鄉鄰仰其周卹以爲生者甚衆子之琪之璵孫基博學能詩古文爲邑才士

李泰字左民姿性瀟灑幼卽善畫嘗入玉女山跌坐鴛鴦松下有翠雲如蓋亭亭竟日冥心超悟繪事遂造神品遊京師一夕儷白妃青寫七寶瓔珞金粟如來妙相張護國寺觀者如堵一時王公貴人朱輪翠幃填雜還咸稽首膜拜歎息欣悅以爲得未曾有各遂震都下孫增克荷家學徵叅北苑乾隆庚午修邑乘延繪圖

蔣鍾尹字愚溪興化人擅技黃術著傷寒彙解爲醫氏指

南走燕齊秦晉間至輒戶外屨滿又著有雪遊詩草既而倦遊與石京張槎朱學潛爲樂餘會衣冠譚笑有君子風焉

江漢龍字時化善醫順治九年大饑冒襄竭力拯救瘞死亡飯老幼扶病危三閩月勞勩致疾僵卧七日如死狀邑令陳禱於神不應詣漢龍求診視曰脉伏重淵春氣至冰未卽釋三日常自起已而果然子源辛卯舉人精亦以醫名世

竇之儀字禹伯善畫人物與仇十洲異曲同工康熙初游京師曾畫幽風圖以進名噪藝苑

許容字默公工篆刻渾古堅勁得史籀遺意善畫時作山水蕭散有逸致當代巨公卿樂與交焉名傳都下

冒瓚字象珠號芳洲植品端潔善奕稱國手多羅慎郡王賜額高人一着諸城劉相國文正公目爲仙品楸枰相對輒曰技固妙更難得此人桐城張太史鵬翀畫松題贈云玉署蕭閒下直時酒酣墨汁潑淋漓長安金帛如山積誰似風流賭奕棋蓋欽其品度也冲澹高邁傾倒一時竟以踈脫忤貴人構禍謫豫時太倉畢秋帆爲大中丞邀入署詩酒唱酬上下古今移陝撫摯以往制軍勒簡致之相得甚歡長白海公撫江右一見狂喜若出望外非直其藝精也稜稜然履潔懷芳技也而進乎道矣

學焉取經史子集臚列類分朝夕諷誦務求淹通盛暑
祁寒丹鉛不去手初致中構茅齋藏其友人劉亮所欲
獻書永樂間忽詔命御史中璫及郡太守下縣一縣皆
驚基笑曰此來始購書耳幅巾深衣謁御史御史賓禮
迎勞之曰先生得無懼乎示以朝命果如所言基盡發
藏書載數舟上之御史勸之仕辭恬澹蕭散山林之趣
時形篇章當時推能文而又精醫理多所施濟宣德中
壽七十四卒鄉人稱爲潛德先生

許則字景芳少棄諸生補父役爲周府儀衛晚得代歸隱
於柴市灣種竹萬竿中置一軒日事觴詠嘗有詠懷詩
江湖少年夢桃李故園春得魚惟問酒乞火或呼鄰林

泉無別主天地有闕人布韋身亦貴藜藿味偏珍爲名
流所稱得壽最高子軌孫某俱有父祖風皆至九十餘
許徵字用正布衣醇樸有隱君子風自宣德歷宏正間推
鄉耆爲鄉飲賓饗二豆以至六豆者凡二十有七壽九
十有一

石沆字灑仲羌竈人少卽翛然有出塵之想好樓居積數
月不下嘗辟穀淡旬聞床下蟻鬪而止竈故有煎辦役
族人知其避事橫索百出寧僱人自代未嘗一呈身於
官中歲移入城居不交雜賓構一靜室匡坐其中焚香
讀書而已兄藩弟湛相唱和有白雲居士集四卷選詩
者多取冠近代名人之首

李士伯字彥長邑之白蒲人以貴入成均好結納海內知名士如屠隆陳繼儒輩咸與唱酬所著有瀟湘館香雪林髯叟堂諸刻行世

國朝

祭元美字乾長號毓奇邑庠弟子員引例讀書成均歲滿例受秩元美嘆曰吾不能以文章博高第烏用是區區者為哉歸就城東地構壺領園積書千種課四子日讀其中前兵部職方陳震生素知元美賢疏其才品薦之當路使者三至門皆辭弗就越明年亂民數萬人薄城下城中兵不滿百縣尹朱邦政就元美與議元美從中贊畫并出金粟餉軍士人人買勇爭先城得以全都督孔公統禁卒靖江海餘氛與元美俱往經馮家莊鄉

民有土樓踞以自固孔公下令縱火焚之元美拜馬下為請命得全活者男女百餘人至今東村人猶尸祝之孔公復

命疏列元美名元美曰元美少無宦情茲行也特為桑梓故何敢

藉此希榮力以老辭子日懼邑增生日舒廣東理問日御順治二年選貢日麗隱居力學臯人士稱為偉俠丈夫

黃輔世字長儒邑廩生每試輒第一方歲薦脫巾衫去教授村塾邑令李文秀聞其名具幣帛聘纂修邑乘年八十六卒

吳世式字國表明諸生隱居白蒲鎮之竹莊性孤傲不與

人通於書無所不讀隨意進取肆力於詩古文詞尤精樂府歌行臨歿命焚其稿友人掇拾其餘有九龍子一卷潛書一卷竹莊詩集四卷

姜道周字子齊白蒲西河人棄諸生隱居授徒與竹莊老人爲友日相賡和竹莊激昂悲憤以少陵爲宗道周略不經意偶然寄興有淵明之風先是倪元璐嘗渡江訪之爲題其廬曰快宜後倪殉節死不忍忘故友遂取以名其集焉

陳于廷字太元鄉飲賓北塘子也北塘晚病目盲不能跣步于廷朝夕侍數年父歿哀毀骨立中外以孝聞潛心理學善屬文門下多知名士乙卯余大美魁江左丁丑

曹鼎臣捷南宮廷數奇竟以明經終老子字純甫有父風弱冠入成均久次當謁選洵性恬退不求仕進築一室讀父書以歿世

余曰麗字華之元美季子也諸昆皆席豐厚日麗所寄托遠不喜專事家人生產於壺領園西別構數椽題曰亦園植竹千竿衡書把盞其中因號竹隱性不樂與顯者接惟山人邵潛范霽輩至卽延入嘗置一舫日泊柳浪蓼花中與鷗鷺爲羣閒步城隅見有遺尸暴露隨立愿施棺千具凡貧不能殮者皆給之中年早卒未克竟志子宗瓚每爲悵念欲踵行而未能焉有樗壽堂日記四

卷行世

張圯授字孺子皐邑庠生也寄居海安母爲賊所害及長鑄一利及名曰張千秋出入寤寐必偕遍訪其仇不可得飲痛終身焉善詩著述甚富與冒巢民交善凡遠邇至縣訪巢民者必訪之題所居曰楊柳岸曉風殘月之屋貧老無子勸之仕不屑也邑令周振菴學博顧瞻廬張嘯竹月有問遺壽登九秩而終

夏官字圻父邑諸生工詩善書畫高風曠致妙絕一時崇禎間知縣王蚪生倡興古學於三百士子中獨許官爲知言爲序其間氣堂集行世

國朝周侍郎櫟園爲廣陵離使重其名檄臯令延致官不可強而後出比至握手懽甚出三百金爲壽一時大賈富

商爭結歡釀千餘金送之歸官至半途復返廣陵召優人遊保障湖張樂數日揮千金盡之笑曰此何異五月披裘而拾遺金也

姜日章字旦童號全圃子治北李家堡人先世隱於農皆潛德不耀日章生有異質兩手握巨黑痣紋理錯縱皆成字家貧少孤鬻草給母甘旨肩草入市不計其值得錢貽母卽入范公隄畔兀坐無間寒暑作尋源論三教一理之義彰微闡幽文義燦然又作天然窮源字韻七載書成人鮮有喻之者歲壬寅十有二月丁卯作偈曰浮沉六十年落魄無人識作書欲窮源源窮人已寂先天本虛空後天生枝葉我今反先天虛空一輪日語畢

如皋縣志 卷十一
端坐而逝先是臯城有二白雅集聞之道書白雅所集之地下必有得道者王寅春黃鶴過弟子宋融曰余前二十年見先生詩有盒中黃鶴如飛出直出蓬萊園苑洲先生其迨將逝乎竟如其言嗚呼白雅集而道成黃鶴過而化去先生固非凡人也

陸良才名文奇闕家河人少孤貧甚倜儻負氣節肝膽若雪與太湖魯之貞交最篤年二十六始讀書好讀管子公穀左氏兵略諸書作古來名將論若干篇槍法爲天下第一而不屑屑與執戟者伍往來燕楚正閩粵間督撫提鎮聞其名皆倒屣迎有薦之仕者笑却之晚年隱於江臯以布衣終

范捷字越山自號鹿裘念一之夫喜中夜讀書親年九十餘老病篤癡捷抱足而眠三年不倦年四十不出里閭既葬母浪跡海陵廣陵之間故舊欽企多釀酒邀留之欣然止宿雖遊朔屢易不厭也友人汪宏築止經樓留與說詩樓在艾陵北湖上才思敏甚日可得數千言隨手散失多爲人取去所著三聖頌白華賦萍賦哀蓀水喻至今淮海間誦之

宋王安石字介甫臨川人初爲淮南判官以事出如臯嘗
過主簿陳興之蓋安石父佐臨江軍時興之爲守
與安石有世故云後興之以進士得嘉慶院解再過之
其遷晉江也有文贈其行重憐其才乃知此地安石定
有車轍馬跡焉集中有食蟬蠹詩疑卽寓臯時作也
曾肇字子開縣令曾易占子也隨侍至臯讀書中禪寺構
隱玉齋以居後成進士再以集賢殿修撰來知泰州卽
大父致堯舊仕也三世皆莅海陵時人榮之作三至堂
以侈其事歷龍圖閣學士崇寧初累貶濮州團練副使
卒謚文昭

流寓

宋王安石字介甫臨川人初爲淮南判官以事出如臯嘗
過主簿陳興之蓋安石父佐臨江軍時興之爲守
與安石有世故云後興之以進士得嘉慶院解再過之
其遷晉江也有文贈其行重憐其才乃知此地安石定
有車轍馬跡焉集中有食蟬蠹詩疑卽寓臯時作也
曾肇字子開縣令曾易占子也隨侍至臯讀書中禪寺構
隱玉齋以居後成進士再以集賢殿修撰來知泰州卽
大父致堯舊仕也三世皆莅海陵時人榮之作三至堂
以侈其事歷龍圖閣學士崇寧初累貶濮州團練副使
卒謚文昭

文天祥字宋瑞廬陵人以右丞相勤王渡江舟過海安如
阜凡三百里舟與追騎相距瀕于危者數矣時朱省
二受元命宰阜公不知而過之既聞惶恐慮不免藉張
阿松衛送至通州汎海公指南集有過如阜諸詩同行
張少保使徐新班錄之揭于宋家嶺東嶽廟之楣間後
死燕市景泰中追謚忠烈前令黎堯勳剏祠祀公於阜
陳瓘字瑩中南劍州沙縣人中甲科爲司諫議論持正務
有大體極論蔡卞章惇邢恕之罪復以書抵曾布論其
過出知秦州崇寧中被竄其子正策告蔡有動搖真宮
迹下正策開封獄併逮瓘瓘曰京之奸邪固嘗論之於
諫省豈特今日語言間耶獄具正策流海上瓘安置通

州後又連竄卒贈諫議大夫謚忠肅墓在東十五里蔣
家莊

明劉亮吳郡人元末嘗仕於僞吳後知天命有歸乃以數
巨艦盡載所藏書萬餘卷渡江抵如阜主於冒致中家
且謀獻天府未果上而以疾卒致中因結宇貯之永樂
中遣使取入中秘

屠隆字緯真鄞縣人萬歷丁丑進士以儀部被擿去官嘗
游邑中館李新泰園亭後進望風景附詩酒流連高譚
傾座興酣落筆如風雨驟集劍戟爭鳴見者皆爲辟易
時有冒生愈昌被誣去青衿籍且十七載隆憐其才白
於當路還之廩餼一時稱隆高誼晚節益落拓芒鞋竹

如皋縣志 卷十一
杖幾徧江南北終不振以老士林惜之

國朝陳維崧字其年江南宜興人順治丙申冬渡江訪冒襄

讀書水繪菴十年爲文力追史漢詩筆清麗所著湖海

樓集海內傳誦之舉博學宏詞科授翰林院檢討

吳宸誥字綸宣海門人由恩選歷官開封府太守罷歸遂

携妻子之如臯家焉宦橐蕭然不干謁當事重之恂恂

如書生未嘗以富貴驕人

邵潛字潛夫通州人慕如臯風土而卜居焉博極羣書工

詩精篆隸持氣節不屑下人貧甚無妻子童僕賣文爲

活著有詩集循吏傳友誼錄引年錄志幻錄州乘資等

書行於世邑令王崱生式其廬署其門爲寓公廬寓中

有產芝之瑞年八十有五同濟南王司李阮亭修禊於

冒辟疆水繪園晚與邑人黃君求友善君求歿其子輔

時與周旋及潛卒割地葬之墓在湯家灣河南黃氏先

塋西南方

桂月字子發浙江慈谿諸生明季時因弟桂辰仕狼山守

備遂家於臯入籍沿海鄉不樂仕進隱居教授藏書數

百卷清介孝友常爲薦紳所推子興宗以臯籍入太學

亦工詩善屬文

朱文心字雕龍善詩工文每談論古今一座皆驚聞山水

佳處不惜走數千里往觀以通州籍流寓如臯子廷彝

爲太學生通志載之甚悉

錢岳字五長通州人其先世多才士至岳更奇屢試不售
謝去舉業以著書自娛凡五十載手不釋筆古文詞賦
無不入妙晚年遷居如臯日與二三老友雅集塵事不
以膺其胸著有漁素閣集其他小品奇書凡數百卷以
千字文編次貧不能付剞劂

顧瀛字湘靈泰州人才性敏捷一目十行終身不忘爲詩
文不屬草頃刻數千言若宿構者博極羣書海內以才
子目之授徒於臯中著錄數十人顧頴唐自放寥落不
羈山左巡撫聘修魯志以諸生爲總裁出分纂諸進士
上手披口授耳聆目歷執簡請者紛逕叢集瀛一一應
之其才足分漑數十人人益服焉將成以疾歸於臯卒

吳進琯字天顏宸誥孫性剛方家貧不妄千人篤志好學
爲文章於湯韓法脉得其三昧設教如臯其弟子擢科
第舉茂才者近百人皆研究慶歷見者不問而知爲先
生弟子初食餼江都移籍海門仍居如臯乾隆丙辰恩
貢入成均年七十一卒

金敞字廓明號闇齋祖德利父恬默以績學世其家敞生
具逸才有希賢希聖之志痛兄伯修早逝事寡嫂如母
撫遺孤無異已出往來錫山陽羨間世調湯先生陽羨
之躬行君子也與朱慎人鳳台師事之益淬厲於聖賢
之學蓋嘗三至臯焉年七十有七卒於靖

劉名芳字南廬閩人工吟詠書兼隸法居臯十數載後住

如皋縣志 卷十七
軍山著五山志乾隆丁丑恭逢

純皇帝南巡進金焦二山志卒於雨香菴邑令何廷模瘞之狼山

駱賓王墓側

余儀曾字羽尊號黍村明諸生工詩書書得二王家法福建莆田人江南泰州籍游如臯冒巢民推重之所居牕外有老柳顏曰柳濔著柳濔內外編若干卷子國福周眉字白公號南埜蘇郡長洲人工詩古文辭善書畫康熙間遊臯邑與冒巢民劉藜閣張茗柯諸君子爲友花朝月夕詩酒唱酬卒於臯石宣六割北郊地葬焉立碑以表其墓著有南埜詩稿其孫祖勳藏於家曾孫泰附貢生

韶之夔字克諧里居莫考書法得鍾王遺意善畫山水尤工妙游如臯得其筆蹟者爭寶之

陸進字宿凡號樵海一號漱石泰州海寧人也海寧距臯邑四十餘里進與姜恭壽冒春榮輩友善因徙如臯把酒論文刻燭爲詩名噪甚教授生徒如江大銳大鍵兄弟皆出其門已刻未刻詩古文流播江南北年七十有八子鎮鈞鑄皆列膠庠孫增禧

胡裘鏞號西坨山陰人官中書舍人游如臯與仲之琮善精算法工詩有胡舍人詩稿八卷卒葬西場古樹園沈光祀字誦芬浙江人素行端方工詩古文辭

李篤慶字載錫海門人揚郡廩生試輒冠軍擁臯比於臯

如皋縣志 卷十七
者數十年爲文有根柢七薦鄉闈不售以明經司訓南
陵課士勤勞年九十餘猶口講指畫娓娓不倦著有學
庸講義

吳叔元字蒼書號思堂真州諸生工篆隸能詩善畫山水
尤稱絕技在臯三十餘年歿於雨香菴黃楚橋葬之

徐人俊字秀萬通州諸生住如臯與范寔齋史笠亭輩論
文皆心折焉子錫爵庚寅舉人

吳永琮字廷璧歙人也業鹺於臯之掘港場慷慨好義弟
永瑞字拱璧孳孳爲善如其兄瑞子鵬孫丁酉科舉人
孫壽民庠生

孫自立字卓菴通州諸生館如臯遂家焉母孀且瞽專之

至孝無子其門人買地葬之

陳岳號大山崇川人善潑墨山水子模號小山踵先人法
名重臯邑

白佩號雪堂崇川人善山水花卉著色鮮妍不讓暉南田
鄒小山輩人爭購之

凌瑚號香泉崇川人善花卉人物著色白描兼千里龍眠
之妙

王翼鵬號野馬江陰人善山水尤工蘭竹

如皋縣志 卷十七
挂於梁間既墮地有一大瓦正覆之略無所損本戒行甚堅質樸好義日夕持誦經咒不息是以獲善報

元白衣二真人傳逸其名二人嘗過赤岸鄉里人管念九止之宿灑掃一室焚香煮茗爲供迨旦二人已失去室中獨遺二鐵罐內有頭風黑神方管用其方合藥置罐中凡頭風者服之無不立效元末失其罐人以爲神

明安定鄉人傅仲良洪武間從縣回時值大寒見一人卧路傍蓬跣縷寒顫不已仲良憫之携至家爇以爐火不就與之食亦不受因令藉草而卧天明失所在几上留一紙列藥五十九品仍書紙尾云留此報汝仲良作方製藥遇有風癘者治之輒效名曰急風一字散至今

猶傳

孫念二公者逸其名自北徂東田連阡陌與妻蔣媪持齋奉道以田三百畝盡施於靈威觀相傳拔宅而昇本觀道家至今奉香火縣之孫公蔣婆二舖所自名也

嘉隆間有蔣道人者止丁堰真武廟每夜中解散數珠以手捫拾或至達旦久之珠自放碧光都如白晝鎮西橋下有怪石俗患之呼爲鬼橋道人焚符仗劍夜詣橋下石裂爲四其一今存真武廟前徑三尺許而鬼橋猶仍其名未改也嘗舟行阻石尤以一符置檣竿張颿疾行人皆異之雙店有殷世傑者亦能禁鬼而不善遣適馬塘趙氏女苦於祟請於世傑世傑縛一鬼詣蔣蔣畫灰

作圈置鬼其中徐步揮劍惟見鮮血迸流衆就審之乃一貓頭也趙崇遂絕

國朝沈宗周邑廩生常刺船遊狼五山鎮日枯坐獅子峰下一夕聞劍山鸞鶴有人歌曰大鼎靈珠似火紅不曾擒得總成空恍然有契既歸檢叅同悟真諸書卽水乳合遂謝絕人事與蔣山行悅席月澗門橫琴雲際辭世之日玉柱雙垂俄有鬱攸飛絲一縷蜿蜒袂上倏忽迸落如九冶淬花童子驚以杯水沃之遂逝

行悅字梅國高僧也博學工詩行楷法魯公張茗柯師事之師嘗爲茗柯設三誓五願三誓者凡遇外誘作盲子想凡遇人倫作處女想凡遇侮慢作驢提想五願者願

如寶花入而不汚願如寶輪轉而不折願如寶座高而不傾願如寶瓶滿而不溢願如寶燈光無不照著語錄八卷行於世

吳伯偉名道顯車馬湖人秉性冲素不濫交遊六十外遊歷黃山武當諸勝地數年歸構精舍獨居謝絕世務康熙戊寅壽登百歲縣令趙昌標匾旌曰熙朝人瑞縣令周鼎鑑造廬稱賀題曰百歲仙翁後三年晨起對日長笑而逝

清憲道士字赤臣姓章氏關帝廟住持也善醫邑嘗疾疫憲設藥局於廟之東庶濟活甚衆又善祈禱遇水旱登壇施法無弗應者廟大殿災出橐中所蓄千金又廣爲

如歸縣志 卷十七
募化重新之其自奉布衣疏食甘於淡泊得錢卽用以
修葺及歿貧無以殮邑人爭斂錢爲治衣衾棺槨蓋黃
冠之傑出者

道士朱陽瑄字瑤章阜之范湖洲人年五歲父朱公老無
家室孑子依藥王廟黃冠段老屬師事之瑤章性端慤
寡言笑神清骨秀灑然出塵有葛某寓廟遺金追還之
其矚然不滓類如此父疾禱於神割股以進遂瘳父卒
後感段恩事之如父博覽經史勤苦學道雖酷暑嚴寒
無間晨夕閱三十年如一日乾隆五年冬無疾而逝年
六十一其徒曰修文修文之徒曰蘭坡蘭坡善祈禱乾
隆十二年夏禱雨立應邑令鄭見龍贈以珮疊青霞之

額

道士曹合真幼好道經長入靈威觀作黃冠遇異人授爐
火之術兼善禁禳出已資修廟殿宇巍煥爲人和而介
布衣菜羹澹如也卒年七十歲

僧化昱精通內典邑紳延主菩提丈室入門卽募修殿宇
一新能詩見琅五藏珍甲戌春坐化徒濟傳募捐九勝
於師如大悲樓金剛殿皆所創建甲午西歸

成岳苦行修建碧霞山能詩著有石根集

明度號鐵船係江西瑞金縣學生員後爲僧嘗露坐雷雨
三晝夜不稍動工書法能詩主掘港場西方寺年七十
有四卒

徐大魁文峯閣道人不苟葷不飲酒終日在城內外檢拾字紙間有遺券誤入必追尋還其人每夜趺坐不寐如是二十餘年坐化

僧理清號識真湖廣寶慶府邵陽縣人年二十竺雲峯出家擔簦參學寒暑一衲嘉慶癸亥冬挂搭廣福寺自知死期三日前預告大眾至日踣跌而逝尸三日不僵

